

Ī nyúucarij ti jaxaj je'ej ti ĩ Jesús tyi'tíj tyaataséjratyej a'íjci ĩ Juan

Ī nyúucarij ti jin uhuatyóochej

¹ A'íi pu a'íin pué'een ĩ nyúucarij ĩ Dios ti jaaté'exaa a'íjci ĩ Jesús ti ajta Ciriístu' pué'een, ta'aj ij ĩ Ciriístu' huo'taséjratye'en a'íimaj ĩ maj jahuiire', je'ej ti jiye'tzín atyojo're'nyesij. Ciriístu' pu'ij séej jo'ta'ítyaca' ĩ ti tajapúa tyí'huiire', tí'ij jaataséjratye'en a'íjci ĩ Juan, ² a'íi pu'ij já'mua'ixaatye' ĩ nyúucarij ti a'yan tyi'ja'yájna, ajta tyámua' tyá'mua'reej a'íjci ĩ nyúucarij ti Dios jimi já'ma'can, a'íjna jime' je'ej ti huaríj ĩ Jesús ti ajta Ciriístu' pué'een.

³ Che' huatóotyamua've'en a'íjna ĩ ti huá'ixaatye' ĩ nyúucaria'ra' ĩ Dios, miche' majta huatóotyamua've'en ĩ maj janamuj, majta ja'tzaahuatye' a'íjci ĩ nyúucarij, jí'nye pu'rij tin a'ájna atyojo're'nyesij tí'ij a'yan tye'mej je'ej ti tyé'yu'si' a'íjci jitze ĩ yu'xarij.

Juan pu hua'tyojtye' a'íjma ĩ maj jusi'rii ĩ tyeyúuj tzajta' ti aráahua'puaj tya'rá'asej

⁴ Nyáaj ĩ nyaj Juan pué'een, nyáaj nu já'muatyojtye' mu siaj arahua'puaquej jusi'rii a'áa ti huataca'aj a Asia. Siata'aj ja'ancuriá'an ĩ ti jin tyámua' tyajamuaatá', ajta jamuaatyápua'ritye'en ĩ ja'mua tzajta',

a'íjna ti jájcuaj imuáj séjria'ca'aj, ti ajta ijíj séejre', ajta jusén jin séeria'aj ta'mej, miche' majta tyámua' jamuáa'uurej i júuricamej i maj aráahua'puaj ará'asej i maj a'áa já'sejre' jo'tíj i Dios jo'tyájcaj i ipuárij japua, ⁵ che' ajta a'íin tyámua' tyajamuáacha'íin a'íjna i Jesús ti ajta Ciríistu' pué'een, i ti néijmi'i jin tyámua' een, ajta a'íin pué'een i ti anaqueej huatájuuriaca', ajta a'íjna jin antyúumua'reej ti tyihuo'ta'íjtye'en néijmi'caa i maj tyityatatyíj íiyan i cháanacaj japua. Ciríistu' pu taxie've', ajta juxúure' jin tyu'nájchitaca' ti'ij tajapuá huatányuunyij i tyaj jin ootyá'itzee i Dios jimi, ⁶ a'íi pu taatá' tyej tyij jamuán tyu'ta'íjtaj, ajta ta'antyíhuo tyej tyij tyu'tyáhuire'en a'íjci jimi i Dios ra', i ti ajta jajvástara'. Che' a'íin huápu'íj naa huasé'rihua'an, ajta néijmi'i jin tyu'ta'íjtaj jusén jime'. Che' a'yan tyá'ra'nyij.

⁷ Ciríistu' pu jéetirij jitze aje'cáamej. Néijmi'i mu jaséjran, a'íi mu majta jaséjran i maj jaajé'caj, majta néijmi'i i tyeítyee mati'ij mana'aj pua'máj a'yan séejre' i cháanacaj japua, a'íi mu juyiinyen mati'ij jaaséj. Che' a'yan tyá'ra'nyij.

⁸ “Nyáaj nu a'íin pué'een i ta'nájcaj, nyajta i tu'vé'tyajtij”, a'yaa pu tyí'xaj a'íjna i tavástara', ti ajta Dios pué'een i ti néijmi'i putyí'uurej, i ti ajta jájcuaj imuáj séjria'ca'aj, ajta i ti jusén jin séeria'aj ja'mej.

Juan pu jaaséj a'íjci i Ciríistu'

⁹ Nyajta nyáaj Juan, i nyaj já'mua'ihuaara' pué'een, nyajta nu jimi séejre' i Jesús a'íj nu jin nyajta ja'mua jamuán tyu'ta'íjtaj i

Dios jimi, nyajta ja'mua jamuán jajpuéetzij na'mej tyej tyij néijmi'i jin tyo'táviicue'. A'yaa nu tyihuó'ixaaaj i nyúucaria'ra' i Dios, nyajta jaaxájtaca' je'ej ti huaríj i Jesús, a'íj nu nyij jin a'áa já'nami'huaca'aj jo'tíj ja'ráahuachij a jáata' ti a'yan tyaja'rájtyapuaaj tíjin Patmos. ¹⁰ Tí'ij a'ájna putyí'rijcaa mati'ij pua'aj jana'michej i tavástara', a'íi pu i júuricama'ra' i Dios a'yan rájve nyéetzij jimi, nyati'ij nyij jáanamujri' ti nyahuárita' a'tíj ca'nyiin jin naatajé, a'yaa pu namuajria'ca'aj tí'ij tipua'aj a'tíj ucáajijhua i a'huáj jitze, ¹¹ a'yaa pu tyí'nye'ixaatya'ca'aj tíjin:

—Ootyéeyu'xaj i yu'xarij jitze je'ej paj tyi'tíj tyí'sej, pajta je'en huo'ta'ítyi' i maj arahua'puaquej jusi'rii i Dios jimi, a'áa ti huataca'aj a Asia, a'ájna a Éfeso, Esmirna, Pérgamo, Tiatira, Sardis, Filadelfia, ajta a'ájna a Laodicea.

¹² Nyati'ij nyij ooré'nyeeriaca' nyej nyij jaaséej a'tíj ti tyí'nye'ixaatya'ca'aj, nyati'ij a'yan huaríj aj nu nyij arahua'puácaa huaséj i cantyíij ti japuan antyítaa á'yi'ij, ajta ooroj jin taavijhuaca'aj, ¹³ ajta a'ájna jé'ta' jo'tíj ja'antytátzajmee, síj pu a'áa huatyávaaca'aj ti a'yan huasé'rihua'aj tí'ij tyéviij, a'yaa pu eenye' tyi'tyéchajca'aj cáanarij jime' ti títi'ij, ajta puásij jin ahuóoji'ca'ca'aj ti ooroj jin taavijhua. ¹⁴ Cuéeinavi'can pu cácipuaca'aj, tí'ij muxáj a'yájna tí'ij ajta huasé'rin i séerij, ajta i ji'sáara' a'yaa pu huasé'rihua'aj tí'ij tiéj. ¹⁵ Ajta i icájra'an a'yaa pu huasé'rihua'aj tí'ij tyi'tíj ti me'estíj, huápuí'ij pu naa tyi'tyama'astájiyicaa, ajta tí'ij

tyí'xajtaca'aj, a'yaa pu namuajria'ca'aj tí'ij jo'tij ja'ancáamuí'vej tí tyájujhua'naj ca'nyíin jíme'.
¹⁶ Ajta i jumuáca'ta' pujmua' pu arahua'puácaa i xú'ra'vej iityáaca'aj, ajta i tyényi'tze' pu éejnyinyiica'aj i chúun tí huápuí'ij tyí'itzi' ajta juxa'aj tya'antámuamuaa. Ajta i nyéerima'ra' a'yaa pu tyá'taaca'aj tí'ij i xicáj tí néijmi'i jín eerá'jxirej.

¹⁷ Nyati'ij jaaséej, aj nu nyij arájvej jo'tij ja'ra'íicajmee, ya cuxáa naamuí'. Aj pu'ij a'ín na'ajtamuáriej i jumuáca'ta' tí pujmua' jíme' i jumuáca', ajta a'yan tyinaaté'exaa'j tijn:

—Capáj tyí'tziinye'ej, nyáaj nu a'ín pu'é'een i nyaj anájcaj, ajta i nyaj uvé'tyajtij, ¹⁸ nyajta a'ín pu'é'een i nyaj júurij. Nyáaj nu huámuí'ijcaa, nyajta ijíj nu jusén jíme' júurij. Nyáaj nu a'íjna jín antyínyamua'ree nyaj hue'tyáana'j jo'maj já'cui'nyij, na'ríj nyaj hui'rátóonyij.
¹⁹ Ootyéeyu'xaj i paj períj jaaséej, je'ej tí ijíj tyi'tíj tyí'sejre' ajta je'ej tí tye'mej majca'huáyee.
²⁰ A'yaa pu huatóomua'aj je'ej paj tyi'tíj tyu'séj, i xú'ra'vetyee i maj aráahua'puaj ará'asej i paj huo'séj i nyaj hui'tyáaca'aj nyamuáca'ta' pujmua', ajta a'íjna i tí aráahua'puaj ará'asej i tí cantyíj jitzán antyítaa á'yi'ij tí ajta ooroj jín taavijhua: I xú'ra'vetyee i maj aráahua'puaj ará'asej, a'íi mu a'ín pu'é'een i maj tajapúa tyí'huíire' majta a'íjna jín antyúumua'reej mej mij huó'cha'ín i maj jusi'rii i tyeyúuj tzajta', ajta i tí aráahua'puaj ará'asej i tí jitzán i cantyíj antyítaa á'yi'ij, a'íi pu a'ín tyi'pu'é'een i tyeyúuj aráahua'puaj tí tya'rá'asej.

2

I nyúucarij ti huata'ítyi'huaca' a'íjma jimi i maj Éfeso jóosi'rii

¹ 'Pata'aj a'yan tyaata'ítyi' a'íjci i ti a'íjna jin antyúumua'reej ti huó'cha'íin a'íimaj i maj a'áa jóosi'rii a Éfeso ti jime' yee: "A'yaa pu tyí'xaj a'íjna i ti hui'tyáa' i jumuáca'ta' pujmua' i xú'ra'vetyee i maj aráahua'puaj ará'asej, ajta a'áa ja'yi'vej jo'tij ja'antyitáatimee i ti ooroj jin taavijhua. ² Nyáaj nu néijmi'i mua'reej je'ej siaj tyityetyúucha'ij, nyáamua'ree siaj jéehua tyí'muarie' siajta jéehua á'viicue're', siajta quee hua'xie've' i maj je'ej pua'aj tyityetyúucha'ij. Siajta seríj huo'mua'aj i maj a'yan tyúusejrataca'aj maj a'íin pué'een i Dios ti hua'antyíhuoj, ma' ajta quee camu a'íin pué'een, a'yaa xu sij tyihuo'taséjrataca' maj a'íin pué'een i maj tyí'hue'tacaa. ³ Jéehua xu jajxié'vi'ra'aj siaj sij néijmi'i jin tyo'táviicue', siajta a'íjna jin jajpuéetzij, nyejitzé ma'can. ⁴ Nyajta nyáaj nu jamuaeté'exaatye'ej i siaj jin ootyá'itzeerej nyéetzij jimi, a'íjna jime' siaj quee che' a'yan tyí'nyaxie've' siati'ij anaquéej tyí'nyaxie'va'ca'aj. ⁵ A'íj xu jin jo'támua'reej jo'siaj tyí'tíj jin jo'tyá'itzee nye jimi, siajta seequéj tyú'mua'tyij, a'yájna siati'ij anaquéej tyityetyúucha'íica'aj. Ajta tipua'aj sequée a'yan huárinij, nyáaj nu ja'mua jimi jo'ma'aj na'mej, nyej nyij jamuá'ari' a'íjna i ti antyitátzaj i ti ja'mua jimi séejre', a'yaa nu rinij tipua'aj sequée seequéj tyú'mua'tyij i Dios jimi. ⁶ Maj siajta mua'aj, xá'pui' xu

ricij a'íjna jime' siaj quee jaxie've' je'ej maj ricij a'íimaj i maj a'yan hua'tamuá'muaj tijin nicolaítas, i nyaj nyajta quee nyáaj hua'xie've'.
 7 A'íjna i ti iityánamuaj, che' jáanamuj je'ej ti i júuricama'ra' i Dios tyihuá'ixaatye' a'íimaj i maj jusi'rii i Dios jimi. A'íimaj i maj néijmi'i jin tyu'tyámue'tin, a'yaa nu tyihuo'tá'sij maj jáacua'nyij a'íjna jitze ti séejre' i ciyéj ti jin júurij tá'ra'nyij, a'áa ti ja'távej jo'tij huápu'íj naa jo'éen i Dios jimi.”

I nyúucarij ti huata'ityi'huaca' a'íimaj jimi i maj Esmirna jóosi'rii

8 'Pata'aj a'yan tyaata'ityi' a'íjci i ti a'íjna jin antyúumua'reej ti huó'cha'íin a'íimaj i maj a'áa jóosi'rii a Esmirna ti jime' yee: “A'yaa pu tyí'xaj a'íjna i ti a'nájca, ti ajta a'í pué'een i tu've'tyajtij, a'íjna i ti huamu'í ajta je'en huatájuuriaca'.
 9 Nyáaj nu jamua'reej siaj jajpuéjtzij, siajta quee je'ej tyéejviicue', maj siajta mua'aj nyéetzij jimi xu chíjtyaanyi'ij pué'een. Nyáaj nu jamua'reej maj je'ej pua'aj tyaja'muaxaj, a'íimaj i maj a'yan tyúusejrataj maj a'íjci jitze ajtyáma'can i Israel, ajta capu a'yan tyi'ja'yájna, sulu a'í mu a'íin pué'een i tyiyáaru' maj jimi jusi'rii.
 10 Caxu tyí'tziinye'ej je'ej siaj tya'ajpuéetzij xá'ju'un, ji'nye a'íjna i tyiyáaru', a'í pu séecan mua'ajmaj jamue'tyánasij, a'yaa pu'ij néijmi'caa tyajamuaatyésejra tipua'aj sianá'astijre'ej nusu sequée, siajta tamuáamuata' xicáj jajpuéetzij xá'ju'un. Tyámua' xu néijmi'i jin eenye' siajta tyo'táviicue' nyéetzij jimi, tipua'aj majamuáacui'nyij, nyáaj nu jamuaat'itye'sij i cúruun

ì siaj jìn júurij xá'ju'un jusén jìme'. ¹¹ A'íjna ì tì iityánamuj, che' tyámua' tyáanamuj je'ej tì ì júuricama'ra' ì Dios tyihua'ixaatye' a'íimaj ì maj jusi'rii ì tyeyúuj tzajta': Majta a'íimaj ì maj néijmi'i jìn tyu'tyámue'tin, capu huá'ci'tyij maj jajpuéetzij muá'ra'nyij mati'ij a'íimaj ì maj majtáhua'aj cui'nyij."

I nyúucarij tì huata'ityi'huaca' a'íimaj jimi ì maj Pérgamo jóosi'rii

¹² 'Pata'aj pajta tyaata'ityi' a'íjci ì tì a'íjna jìn antyúumua'reej tì'ij huó'cha'íin a'íjma ì maj a'áa jóosi'rii a Pérgamo tì jìme' yee: "A'yaa pu tyí'xaj a'íjna ì tì jì'tyéechuij ì chúun tì juxa'aj tya'antámuamuaa. ¹³ Nyáaj nu ja-mua'reej siaj a'áa jo'cháatimee jo'tij tyejé'ijtaj a'íjna ì tyiyáaru', siajta mua'aj síoche' xu ná'astijre' nyéetzij. Caxu jaatáxaahuataca' siaj nyéetzij ná'tzaahuatye', caxu siajta a'ájna xicáara' jítze tì'ij a'íin séjria'ca'aj ì Antipas, tì tyámua' éenye'ej nyéetzij jimi, a'íi mu jaajé'caj a'ájna jo'tij tyejé'ijtaj ì tyiyáaru'. ¹⁴ Maj siajta mua'aj, tyi'tij xu jìn ootyá'itzeerej nye jimi, a'íi mu ja'mua jimi séejre' ì maj ja'astej a'íjci ì nyúucarij ì tì jìn tyihua'mua'tyej a'íjna ì Balaam, ì tì ajta a'yan tyaamuá'tyej a'íjci ì Balac tì'ij hue'tzij jìn huo'mué'tij a'íimaj ì maj Israel jítze ajtyáma'can, mej mij tyú'cua'nyij ì cue'ráj ì maj tyu'támu'vejritaca' a'íjma jimi ì sáanturij, ajta mej mij huóoxana'cìre'en. ¹⁵ A'íi mu majta ja'mua jimi séejre' ì maj quee jaxie've' maj ajtáciinyej a'íjna jítze ì huá'yi'raj ì maj a'yan

hua'tamuá'muaj tijin nicolaítas. ¹⁶ A'íj xu jin siata'aj siajtáhua'aj ja'antzaahuatye'en i Dios, na'riij sequée a'yan huárinyij, nyáaj nu ja'mua jimi ja'tanyésij, nyej nyij huo'tanyó'si'tye'en a'íimaj a'íjna jime' i chúun ti nye tyenyij jitze éejnyinyii. ¹⁷ Ajta a'íjna i ti iityánamuaj, che' tyámua' tyáanamuj je'ej ti i júuricama'ra' i Dios tyihua'ixaatye' a'íimaj i maj jusi'rii i tyeyúuj tzajta'. Majta i maj tyu'mué'tin, a'yaa nu tyihuo'tá'sij mej mij jáacua'nyij i cue'ráj ti jútye' já'ma'can, nyajta nu tyetyéj jaatátistej ti cuéeinara', i ti jitzán á'yu'si'ij je'ej ti a'íin jájcuan arí ántyapuj, ajta quee a'tíj jamua'ree je'ej ti tyé'yu'si', sulu a'íi pu'uj i a'tíj jamua'reej i nyaj jaatátistej a'íjci i tyetyéj."

I nyúucarij ti huata'ítyi'huaca' a'íimaj jimi i maj Tiatira jóosi'rii

¹⁸ 'Pata'aj pajta a'yan tyaata'ítyi' a'íjci i ti a'íjna jin antyúumua'reej ti huó'cha'íin a'íimaj i maj a'áa jóosi'rii a Tiatira ti jime' yee: "A'yaa pu tyí'xaj i yójra' i Dios, i ti ajta a'yan eenye' ava'ji'síjmee ti'ij tiéj ti atyúumemej, ajta me'estíican iira'íicajmee ti'ij coobre maj jacámejri': ¹⁹ Nyáaj nu néijmi'i mua'reej je'ej siaj tyi'tíj jin ricij; nyáamua'ree siaj tyámua' tyúuxie've' síj ajta síj, i siaj jitzán tyá'tzaahuatye', siajta huá'huiire' i séecan néijmi'i jin setye'víicue'raj, siajta ijíj, jéetze' xu seríj tyámua' ricij sequée anaquéej. ²⁰ Ajta a'íi pu quee na'ráanajchij siaj tzáahuatyi'ra'aj jimi: tyícha'íj a'íjci i íitaj ti a'yan ántyapuj tijin Jezabel, i ti a'yan tyúuxaj ti i Dios jitze ma'can

tyí'xaj, a'íi pu'ij hue'tzij jin tyihuá'mua'tyej i maj nye jimi séejre', mej mij huóoxana'cire'en, majta tyú'cua'nyij i cue'ráj i maj tyu'támu'vejritaca' a'íimaj jimi i sáanturij. ²¹ Nu'ríj jaatá' tí'ij tyá'antzaahuatye'en i Dios jimi, ajta a'íin capu jaxie've' tí a'yan huárinyij: capu ajta jaxie've' tí jaatapuá'citaj i tí jime' juxana'cire'. ²² A'íj nu jin a'áan yó'ojrasij utáatzij japua, nya-jta a'íimaj i maj jamuán tyu'xána'cirej, aj nu nyij jéehua huápuí'ij puéjtzij huo'tá'sij tipua'aj mequee jaatapuá'citaj i maj je'ej jin pua'aj ricij. ²³ Nyajta huá'cui'nyij i yójmua'mua' i íiti', a'yaa mu mij néijmi'i i maj jusi'rii i Dios jimi tyá'mua'reeren nyaj a'íin pué'een i tí jú'mua'ree je'ej tí a'tíj tyí'mua'tzej i jutzájta', nyajta a'yan tyihuo'tá'sij séej nyajta séej je'ej tí tyi'tíj jin huaríj. ²⁴ Siajta mua'aj mu séecan, mu siaj Tiatira ja'chej, i siaj quee já'astijre' a'íjci i nyúucarij tí hue'tzij pué'een, siajta quee jamua'reej i tí jéehua huápuí'ij juxie've' i tyiyáaru' jimi, a'yaa nu tyajá'mua'ixaatye' nyej quee che' tyi'tíj jin tyajá'mua'ijcatye'en. ²⁵ Siata'aj tyámua' eenye' je'ej siaj tyi'tíj jin ricij, 'asta nyana'aj quee nyajtáhua'aj ya'uvé'nyej. ²⁶ A'íimaj i maj tyu'tyámue'tin, majta móoj a'yan tyámua' tyi-tyetyúucha'íj je'ej nyej nyáaj tyá'xie've', 'asta na'aj quee néijmi'i tye'entyipué'rej, nyáaj nu huo'ta'sij mej mij tyihuo'ta'íjtye'en a'íjma i maj séej chuéj japua jo'cháatimee, ²⁷ ca'nyéjrij pu jin tyihuo'ta'íjtye'sij, a'yaa pu cha'taj na'aj tyihua'antypuá'ritye'sij a'íjma i maj jájcha'íire' tí'ij a'tíj tí jaatyáataaraxi'in i xá'rij tí xaríj

jìn taavijhua, a'yájna tí'ij ajta ì nyavástara' nyéetzij tyinaa'íjcaj. ²⁸ Nyajta huo'ta'sij mej mij a'íimaj tátzave'ej muá'ra'nyij tí'ij ì xú'ra'vej tí eeré'nyinyii tapuá'risima'caj. ²⁹ A'íjna ì tí iityánamuaj, che' tyámua' tyáanamuj je'ej tí ì júuricama'ra' ì Dios tyihuá'ixaatye' a'íimaj ì maj jusi'rii ì tyeyúuj tzajta'."

3

I nyúucarij tí huata'ityi'huaca' a'íimaj jimi ì maj Sardis jóosi'rii

¹ 'Pata'aj a'yan tyaata'ityi' a'íjci tí a'íjna jìn antyúumua'reej tí huó'cha'íin a'íjma ì maj a'áa jóosi'rii a Sardis tí jime' yee: "A'yaa pu tyí'xaj a'íjna ì maj jitzán séejre' ì júuricama'ra' ì Dios ì maj aráahua'puaj ará'asej, tí ajta hui'tyáa' ì xú'ra'vetyee ì maj aráahua'puaj ará'asej. Nyáaj nu jamua'reej je'ej siaj tyí'muarie', nya-jta nu jamua'reej siaj seríj nye jimi mui'chij, tyij majta a'yan tyí'muaxaj yee síoche' xu júurij. ² Siata'aj atanyéjnye'rej, siajta tyámua' tyú'uurej a'íjci tí óoj ja'mua jimi tyí'sejre', ajta arí tímua' tye'entyipua'rij, jí'nye a'yaa pu tyí'muasej a'íjna je'ej siaj ricíj capu xá'pui' een ì Dios jimi. ³ Siata'aj jo'támua'reej je'ej maj tyajamuaamuá'tyej ì siaj ja'ancuriáa', siata'aj a'yan huárinyij siajta je'en ì Dios jimi aj-tyáhuiixi'in. Típua'aj sequée atanyéjnye'rej, nyáaj nu jo'ma'aj na'mej ja'mua jimi tí'ij náhua'rij, siajta mua'aj caxu jamua'reej a'tzáaj nyaj ja'mua jimi ja'tanyésij. ⁴ Séecan mu ja'mua jimi séejre' ì maj quee tyi'tíj jìn á'itzeere' ì

jutzájta', a'íi mu mij nyaj jamuán huací'ca'aj muá'ju'un cuéeinavi' metyu'cháaj, ji'nye a'yaa pu tyihua'tyévijtye' a'íjma. ⁵ A'íimaj i maj tyu'tyámue'tin, a'yaa mu cuéeinavi'can tyi'cháaj muá'ju'un, nyajta quee jo'rio'uunaj je'ej ti ántyapuj i yu'xarij jitze i maj jitzán á'yu'si'ij a'íimaj i maj jusén jin huatyá'itzeere'ej i Dios jimi, sulu nyáaj nu huo'taxájta i nyavástara' jimi, nyajta a'íjma jimi i maj jimi tyí'huiire' i nyavástara'. ⁶ Ajta a'íjna i ti iityánamuaj, che' a'íin tyámua' tyáanamuj je'ej ti tyihuá'ixaatye' i júuricama'ra' i Dios a'íjma i maj jusi'rii i tyeyúuj tzajta'."

I nyúucarij ti huata'ityi'huaca' a'íjma jimi i maj Filadelfia jóosi'rii

⁷ 'Pata'aj a'yan tyaata'ityi' a'íjci i ti a'íjna jin antyúumua'reej ti'ij huó'cha'íin a'íjma i maj a'áa jóosi'rii a Filadelfia ti jime' yee: "A'yaa pu tyí'xaj a'íjna i tyámua' een ti ajta tzáahuatyi'ra'aj jin tyí'xaj, a'íi pu a'íjna jin antyúumua'reej ti huo'tá'an mej mij a'áa jo'tyájrutyey jo'tij já'sejre' a'íjna i ti jitzán eeráma'can i David, tipua'aj a'íin tya'antácuunaj, capu i'rij ti a'tij tye'tyáanaj, na'riij a'íin tye'tyáanaj, capu ajta i'rij ti'ij a'tij tya'antácuunaj: ⁸ Nyáaj nu néijmi'i mua'reej je'ej siaj ricij, cási' xaaséj, nu'rij tyajamua'antácuunyej siaj sij juxáahuaj utyájrutyey, ajta quee i'rij ti a'tij tye'tyáanaj, nyáaj nu jamua'reej ti quee jamú'ca'nyisti', siajta síoche' xu tyá'astijre' je'ej nyaj tyajamuá'ixaa, caxu ná'xaahuaj. ⁹ A'yaa nu huá'uurej a'íjma i maj tyiyáaru' jimi jusi'rii,

i maj tyí'hue'tacaa a'íjna jime' maj a'yan
 tyúusejrataj maj Israel jitze ajtyáma'can, a'yaa
 nu ca'nyéjrij jin huá'uurej mej mij mujo'vá'ju'un
 majta je'en tyítunutaxi'in ja'mua jimi, mej mij
 a'íjna jin jáamua'reej nyej nyáaj já'muaxie've'.
¹⁰ Xu'ríj ja'rá'astee je'ej nyaj tyajamuaata'íj
 a'íjna jime' siaj néijmi'i jin tyo'táviicue'ri',
 a'íj nu jin nyáaj ja'muacha'íj na'mej a'ájna
 xicáara' mati'íj néijmi'i jajpuéetzij muá'ju'un
 iyan cháanacaj japua, mej mij jáamua'reej
 i maj a'yan huacháatimee. ¹¹ Jiye'tzín nu
 yava'cányesij. Tyámua' xu néijmi'i jin eenye'
 je'ej siaj seríj tyu'muáriej, caxu tyi'tá'care'en
 tí'ij a'tíj jamuaanáhue' i siaj seríj jaamué'tíj.
¹² A'íimaj i maj tyu'tyáamue'tíj, a'yaa nu ty-
 ihuo'tá'sij mej mij tyityetya'úuj muá'ra'nyij u
 tyeyúuj tzajta' i nyaj Dios tí ja'a'rij, ajta quee
 che' a'náj iiráamej, a'íjma nu jitze jo'tyéyu'xaj
 je'ej tí ántyapuaaj i nyaj Dios, nyajta je'ej
 tí tyaja'rájtyapuaaj chájta'najra' i nyaj Dios,
 a'íjna i Jerusalén tí jájcuaj, tí ajta tajapuá
 je'cáanyej jo'tíj i nyaj Dios já'sejre', a'íjma nu
 nyajta jitze jo'tyéyu'xaj je'ej nyaj jájcuan jin
 ántyapuaaj. ¹³ A'íjna i tí iityánamuaj, che'
 tyámua' tyáanamuaaj je'ej tí i júuricama'ra' i
 Dios tyihuá'ixaatye' a'íjma i maj jusi'rii i tyeyúuj
 tzajta'."

*I nyúucarij tí huata'ítyi'huaca' a'íjma jimi i
 maj Laodicea jóosi'rii*

¹⁴ 'Pata'aj a'yan tyaata'ítyi' a'íjci i tí a'íjna jin
 antyúumua'reej tí huó'cha'íin a'íimaj i maj a'áa
 jóosi'rii a Laodicea tí jime' yee: "A'yaa pu tyí'xaj

a'íjna i ti tzáahuatyira'aj jin tyí'xaj ajta néijmi'i tyámua' jin een, ajta a'ín pué'een i ti Dios jamuán néijmi'i tyú'taahuaca' ti'ij na'aj ijíj ti tyí'sejre': ¹⁵ Nyáaj nu néijmi'i mua'reej je'ej siaj tyi'tíj jin ricij. Nyáamua'ree siaj quee ooca'nyáaj sianaataxie'vej nyéetzij, caxu siajta ca'nyéjrij jin ná'antzaahuaj. A'yaa pu tyina'ráanajchi siaj ooca'nyáacan jin naa nyojo'mua'raj, na'riij sequée ca'nyéjrij jin ná'tzaahuatye'ej. ¹⁶ Siajta cí siana'aj tyiná'tzaahuatye', caxu a'yan tyí'huiire' ti'ij jájtyij ti jéehua pistij nusu ti jéehua cimujraa, a'íj nu jin a'yan já'mua'uurej nyej nyij ca'nyéjrij jin majamúuhua'xij. ¹⁷ A'yaa xu tyí'xaj siaj mua'aj chíjtyaanyi'ij pué'een, ti jee jéehua jamuáahuii, ti jee ajta quee tyi'tíj jamuá'itziitye', siajta mua'aj caxu jamua'reej siaj xána'visi', siajta je'ej pua'aj huá'sejratye' i tyeítjee, mua'aj xu quee je'ej tyéejviicue', xa'racúcu'nyijmee siajta muámua'vi'ijmee. ¹⁸ A'íj nu jin a'yan tyaja'muahuavij siaj nyéetzij jimi jáananan i ooroj ti tiéj jitze juta'huacaa, siata'aj sij jí're'can jime' huatyoochíjtyaanyi'taj, siajta nyéetzij jimi jáananan i cáanarij ti naa tyí'cueenaa siaj sij a'íjci ucóochejtya'xi'in ti'ij quee séejre' i ja'muatyévi'ij i siaj jatyevi'ra' a'íjci jime' siaj muámua'vi'ij, siajta nyéetzij jimi jáananan a'íjci i siaj aróohuatye'en i juji'ij jitze siata'aj sij atanyéjnye'rej. ¹⁹ A'yaa nu tyámua'tyihuá'ixaatye', nyajta puéjtzij hua'tá'caa a'íjma i nyaj hua'xie've'. A'íj pu jin siata'aj seequéj tyú'mua'tyij, siajta ja'antzaahuatye'en i Dios. ²⁰ Cási', nyáaj nu eetyéjvee a ti ja'puertaj

nyetye'ejtyato'xa'aj, tipua'aj a'tíj náanamuj
ajta je'en tyina'antácuunye'en, aj nu nyij
utyárutyij chí'ra'an tzajta' tyej tyij néemi'ij
tyú'cua'nyij. ²¹ A'íimaj i maj tyu'tyámue'tij, a'yaa
nu tyihuo'tá'sij maj nyajamuan oorá'sej jó'nyaj
tyejé'ijtaj, a'yájna nyati'ij nyáaj tyu'tyáamue'tij,
aj nu nyij nyavástara' jamuán huatyéeyixij jo'tij
a'íin tyejé'ijtaj. ²² Ajta a'íjna i ti iityánamuj,
che' tyámua' tyáanamuj je'ej ti i júuricama'ra'
i Dios tyihúa'ixaatye' a'íjma i maj jusi'rii i
tyeyúuj tzajta'."

4

Juan pu huo'séj i maj janajchej i Dios u tajapuá

¹ Tí'ij a'yan tye'entyipua'rej, aj nu nyij
ájnyeeriaca', nyati'ij nyij jaaséj i puéertaj ti
antácuunyica'aj u tajapuá, ajta i nyaj anaquéej
jáanamujri' i ti naatajé ti ajta a'yan namua-
jria'ca'aj tí'ij a'tíj ti ucáajijhua i trompéetaj jitze,
a'yaa pu tyinaaté'exaaj tíjin:

—Mujo'té'yi'ij nyata'aj muaataséjratye'en je'ej
ti tyi'tíj tyúuxie've' ti a'yan huárinyij ma-
jca'huáyee.

² Aj pu'ij i júuricama'ra' i Dios nye jimi
huatyá'ítzee, nyajta je'en ipuárij huaséj ti
ujo'tyávaaca'aj u tajapuá, ajta a'tíj jitzán
huatyácatyii. ³ Ajta a'íjna i ti acájca, a'yaa
pu huasé'rihua'aj tí'ij tyetyéj ti huápu'ij
tyá'najchij ti po'vij ajta ti tyóomuaa á'naxcaj,
ajta a'yan huasé'rihua'aj tí'ij síj i tyetyéj
ti po'vi'ij jin naa tyí'me'estij, ajta cu'xa'aj
atahuíjca'aj jo'tij jo'tyávaaca'aj i ipuárij, ti

tyama'astáji'caa huá'ravi'can jime' a'yájna tí'ij i tyetyéj i maj a'yan jatamuá'muaj tíjin esmeralda, ⁴ ajtáhua'aj pu séecan i ipuárij tya'taváatima'caa jo'tij jo'tyéjvee a'íjna i ipuárij seityéj japuan muáacuaj pu tya'rá'axcaa, majta i huásij acatyé'tya'ajma'caa i ipuárij jitze, cuéinavi' mu tyí'chajcaa, majta cúruun tyo'carújtya'ajma'caa i jumu'új jitze ooroj ti jin tyí'taavijhua. ⁵ Ajta a'íjna jitze i ipuárij a'yaa mu tyityetyána'axcava'ra'aj majta tyényuuca'aj, ajta a'ájna i ipuárij ti jo'tyéjvee, tatzárij pu aráahua'puaj ataváatima'caa, ajta a'íjna i tatzárij a'íi pu a'íin pué'een i júuricama'ra' i Dios ti aráahua'puaj ará'asej. ⁶ A'ájna jo'tij jo'tyéjvee a'íjna i ipuárij, a'yaa pu éenye'ej huariá'muanyica'aj a chóota' tí'ij tyi'tíj ti naa tyí'me'estij ti ajta tátzaj.

Ajta a'ájna jé'ta', jo'tij jo'tyéjvee a'íjna i ipuárij, muáacuaj mu i maj júurij ataváatima'caa, majta jéehua jí'síj hua' jitze séjria'ca'aj, i hua' nyéerimij jitze ajta hua'huarita'. ⁷ Ajta i ti anájcaj a'yaa pu huasé'rihua'aj tí'ij muájyej, ajta i ti je'tyáa'sej, a'yaa pu huasé'rihua'aj tí'ij túuru', ajtáhua'aj i síj ti je'tyáa'sej, a'yaa pu tya'cányeerica'aj tí'ij tyévij, ajta i tu've'tyajtíj, a'yaa pu huasé'rihua'aj tí'ij cué'ra'vej ti huatará'raj. ⁸ Majta a'íimaj i maj muáacuaj i maj júurij, a'íi mu aráseej pua'mácan ajta anájma'caaj síj ajta síj, ajta jéehua jí'síj jitzán séjria'ca'aj, jéjre' ajta tyétye'. A'náj tina'aj mu a'yan tyí'xajtaca'aj majta a'yan tyí'chuiicaca'aj tíjin:

Tyámua' pu een, tyámua' pu een, tyámua' pu een
i tavástara',

Dios pu a'ín pué'een i ti néijmi'i jin an-
tyúumua'reej,

a'í pu anaquéej séjria'ca'aj, ajta ijíj séjre', ajta
jusén jin séeria'aj ta'mej.

⁹ Ajta mati'ijta a'íimaj janajchej i maj
muáacuaj, majta tyé'tyojtzi're'ej a'íjci i ti ipuárij
jitze acájca, i ti jusén jime' júurij, ¹⁰ a'íimaj i
huásij i maj seityéj japuan muáacuaj ará'asej,
a'í mu tyítunutaxij a'íjci jimi i ti ipuárij jitze
acájca, majta jaatyánajchij, majta tyu'tátuiire'sij
a'íjci jimi i tyuucúrun, majta a'yan tyí'xajtaca'aj
tíjin:

¹¹ A'yaa pu tyimuaavíjtye' muéetzij, mu paj
tavástara' pué'een, pajta taj Dios pué'een,
tyej tyij tyimuaatatyójtzi're'en, tyajta
muatyáanajchej i paj jin néijmi'i
putyí'uurej,

ji'nye muáaj paj néijmi'i tyú'taahuaca', i ti a'yan
tyí'sejre',

muáaj paj a'yan tya'ajxié'vi'raca'aj a'í pu jin
néijmi'i tyú'taavijhuaca'.

5

*I yu'xarij ti jiri' ti jitzán tyé'yu'si' ajta i
cánya'aj*

¹ Ajta a'íjna i ti acájca i ipuárij jitze, ju-
muáca'ta' pujmua' pu ji'tyépijca'aj i yu'xarij
ti juxa'aj tyé'yu'si'huaca'aj, ajta arahua'puaquej
pu ájvi'tyijhuaca'aj i xíjca jime'. ² Nyajta séej

huaséj i tajapuá ti tyí'huüre', a'yaa pu'ij ca'nyin jin tyu'ta'íhuoj tijin:

—¿A'tanyíj quee tyi'tíj jin á'itzeere' tí'ij ja'ajsújtza'naxi'in i ti ajvi'tyíihuajmee, ajta je'en jaatáxijta i yu'xarij? ³ Ajta u jútye', ajta íyan i cháanacaj japua, ajta jityán i cháanacaj, capu a'tíj a'yan tyu'tóoci'puaj tí'ij jaatáxijta, ajta jaaséj je'ej ti tyé'yu'si'huaca'aj. ⁴ Nyajta nyáaj jéehua nu huápuí'ij nyeyiinyaca'aj a'íjna jime' maj quee jáatyoy síj ti a'yan tyu'tóoci'puaj tí'ij jaatáxijta i yu'xarij nusu ti jaaséj je'ej ti tyé'yu'si'. ⁵ Tí'quij síj ti hua' jitze ajtyáma'can a'íimaj i huásasij, a'yaa pu tyinaaté'exaaj tijin:

—Capáj ayiinyaj, jí'nye a'íjna i maj a'yan jatamuá'muaj tijin i Muájyej i ti hua' jitze ajtyáma'can a'íimaj i maj Israel jitze eeráanyej, a'íjna i ti David jitze eeráma'can, a'íi pu arí tyu'tyáamue'tíj a'íi pu pújoorej tí'ij ja'ajsújtza'naxi'in i ta'raahua'puácaa ti jin ajvi'tyíihuajmee ajta je'en jaatáxijta i yu'xarij.

⁶ Aj nu nyij cánya'aj huaséj a'ájna jé'ta' jo'tíj jo'tyéjvee a'íjna i ipuárij, ajta jé'ta' a'íjma jimi i maj muáacuaj i maj júurij, ajta jé'ta' a'íjma jimi i huásasij, a'yaa pu huasé'rihua'aj cuxáa meríj jaajé'cataca'aj. Ajta arahua'puácaa ava'ahuájma'caa, ajta arahua'puácaa ava'jí'síjma'caa, ajta i jí'sáara' i ta'ráahua'puaj, a'íi pu a'ín pué'een i júuricama'ra' i Dios i ti a'yan yo'ta'ítýaca' íyan cháanacaj japua. ⁷ A'íjna i cánya'aj, a'íi pu ja'ancuré'pij a'íjci i yu'xarij i ti muáca'ta' pujmua' séjria'ca'aj a'íjna i ti ipuárij jitze acájca,

8 ti'ij ja'ancuré'pij a'íjci i yu'xarij, a'íimaj i maj muáacuaj i maj júurij, majta i huásij i maj seityéj japuan muáacuaj ará'asej, a'íi mu néijmi'i ecóotutaxij a'íjci jimi i cánya'aj. Néijmi'i mu a'íimaj i áarpaj tyi'tyéi'ca'aj, majta túxa'aj ooroj ti jin tyí'taavijhuaca'aj, ajta cuáanye'ej ava'jistíjma'caa a'íjci jitze i túxa'aj, a'íi pu'ij a'ín pué'een i maj jin jahuooca'aj a'íimaj i maj tyeítysteristyamua'mua' pué'een i Dios. ⁹ Majta jájcuan jin a'yan tyí'chuiicaca'aj tijin:

Muáaj paj ji'réenye'ej séejre' pej pij ja'ancuré'pij i yu'xarij pajta ja'ajsújtza'naxi'in i ti ajvi'tyíihuajmee,

ji'nye muáaj paj huatámu'vejrityi'huaca', pajta a'íjci jime' a' xuure' tyu'nájchitaca' i Dios jimi,

néijmi'caa jitze ma'can i tyeítýee, i maj séej jitze maj eeráma'can,

i maj séej nyúucarij jin tyí'xaj, nusu i maj séej chuéj japua já'ma'can.

¹⁰ Pajta tyámua' huó'ruuj mej mij síj mana'aj tyeítýeera' pué'eenye'ej muá'ra'nyij,

mej mij majta tyu'tyáhuüre'en a'íjna jimi i Dios, majta a'íimaj mu tyu'ta'íjtaj íiyan i cháanacaj japua.

¹¹ Aj nu nyij atányeeriaca', nyajta je'en mui'caa huánamuajri' i maj tajapua tyí'huüre' i maj a'áa ja'taváatíma'caa jo'tij jo'tyéjvee i ipuárij, jo'maj majta já'sejria'ca'aj i maj muáacuaj i maj júurij, majta a'íijma jimi i huásij. A'íi mu huápu'i'ij mui'caa, capu

ámiteeria'ca'aj a'chu maj pua'maca'aj, ¹² a'yaa mu mij ca'nyíin jin tyí'xajtaca'aj tijin:

A'íjna i cánya'aj i ti huatámu'vejrityi'huaca',
a'yaa pu tye'tyévijtye'

ti a'íin ja'ancuriá'an i ti néijmi'i jin putyí'uurej,
ajta ti'ij néijmi'i jimi tyí'sejria'aj,

ajta a'íin néijmi'i tyi'mua'réeriaj ajta je'en
néijmi'i jin tyu'tyámue'tin,

tyiche' tyaatatyójtzi're'en a'íjna i ti naa een,
tyajta jimi tyu'táchuiicaj.

¹³ A'yaa nu nyajta tyáanamujri' ti a'íjna i Dios ti tyú'taahuaca' tajapúa ti tyejé'sejre', ajta íiyan cháanacaj japua ti tyí'sejre', ajta jityán ti tyejé'sejre' i chuéj, ajta a'áa maj tyityejé'sejre' i jájtyij jitze ti ve'éj, a'yaa mu tyí'xajtaca'aj tijin:

Tyiche' tyaatatyójtzi're'en a'íjci i ti acájca i
ipuérij jitze, tyajta a'íjci i cánya'aj,

tyiche' jaatyátzaahuatye'en, tyajta tyámua' ty-
eetyátoonyij,

che' a'íin néijmi'i jin antyúumua'reeriaj jusén
jime'.

¹⁴ Majta a'íimaj i maj muáacuaj i maj júurij,
a'yaa mu tyu'taxájtaca' tijin:

—Che' a'yan tyá'ra'nyij. Majta a'íimaj
i huásij, a'íi mu tyítunutaxij majta
jaatyánajchaca' i Dios.

6

A'íjna i ti arahua'puaquej ajvi'tyíhuajmee

¹ Aj nu nyij jaaséej ti'ij i cánya'aj séej ja-
jsújtza'an i ti ájvi'tyijhuaca'aj i yu'xarij jitze,
aj nu nyij séej huánamujri' i ti hua' jitze

ajtyáma'can i maj júurij i maj muáacuaj, a'yaa pu'ij tyu'taxájtaca' a'yan namuáaria'can ti'ij maj huatyényuunyij tijin:

—Mujo'té'yi'ij.

² Nyati'ij nyij atányeeriaca' aj nu nyij cahuáayu' ti cuéeinara' huaséj, ajta i ti avá'catyii a'íi pu tú'namua'aj iityéchooca'aj i jumuáca' jitze. Majta je'en cúruun jaati'ij, aj pu'ij iirájraa ti'ij hua'antyimue'tin a'yaa pu'ij néijmi'i jin tyu'tyáamue'tij.

³ Ti'ij a'íjna i cánya'aj ajtáhua'aj séej ajsújtza'an, a'yaa nu tyáanamujri' ti ajtáhua'aj síij i ti ajta hua' jitze ajtyáma'can i maj júurij i maj muáacuaj, a'yan tyu'taxájtaca' tijin:

—Mujo'té'yi'ij.

⁴ Aj pu'ij ajtáhua'aj síij i cahuáayu' iirájraa ti po'xara'. Ajta i ti avá'catyii a'íi pu a'íjna jin antyúumua'reeriaca'aj ti'ij huo'itziitye'en i tyeítyee i maj a'yan séejre' i cháanacaj japua, mej mij huóocui'nyij síij ajta síij, a'íi pu ajta ja'ancuré'chuij i chúun ti ve'éj.

⁵ Ti'ij a'íjna i cánya'aj ajtáhua'aj séej ajsújtza'an, a'íj nu séej huánamujri' i ti hua' jitze ajtyáma'can i maj júurij i maj muáacuaj, ti a'yan tyu'taxájtaca' tijin:

—Mujo'té'yi'ij.

Nyati'ij nyij nyajtáhua'aj atányeeriaca', aj nu nyij cahuáayu' huaséj ti xú'muara', ajta i ti avá'catyii, a'íi pu ji'tyéchooca'aj i maj jin tya'cá'itie'raj. ⁶ Nyati'ij nyij a'tíj huánamujri' ti hua' tzajta' a tyojo'taxájtaca' a'íimaj jimi maj muáacuaj i maj júurij, a'yan tijin:

—Séej mediidaj i tyerícuj, a'yaa pu tyá'najchij ti'ij a'tíj tyá'mue'tij séej xicáj, ajta huéicaj mediidaj i tyerícuj ti titi'ijme' ijmuéeya'ajmee, a'yaa pu cha'tána'aj tyá'najchij ti'ij a'tíj tyá'mue'tij séej xicáj, ajta capáj yó'jipuan i aséityij, nusu i nahuáj.

⁷ Ti'quij i cánya'aj ajtáhua'aj séej ajsújtza'an, aj nu nyij jáanamujri' ti ajtáhua'aj i síj i ti ajta hua' jitze ajtyáma'can i maj júurij i maj muáacuj, a'yan tyu'taxájtaca' tijin:

—Mujo'té'yi'ij.

⁸ Nyati'ij atányeeriaca', cahuáayu' nu huaséj ti cíi tyí'tyoomuara', ajta i ti avá'caj, a'yaa pu ántyapuj tijin: I ti huá'cui'caa. Ajta síj cújta' huama'ca'aj i ti a'áa tyejé'ijtaj i hua'tzajta' i mui'chítýee, ajta je'cácaa jimi i tyeítýee antyúumua'reej i maj a'yan huacháatimee i cháanacaj japua, mej mij huó'cui'nyij i tyeítýee a'íjna jime' maj tyúunyo'si'tye'en, nusu tújrij jime', na'ríij cui'nyi'ra'aj jime', nusu a'íjma jime' i tyi'tyán i maj tyí'tyaci'macaa.

⁹ Ti'ij i cánya'aj ajtáhua'aj séej ajsújtza'an, aj nu nyij huo'séj jityán i ipuárij a'íjma i maj a'íjna jin huá'cui'iihuaca' maj jaaxájtaca' i nyúucaria'ra' i Dios, majta a'íjna jitze tyámua'tyityahuóocha'ij. ¹⁰ A'yaa mu ca'nyíin jin tyí'xajtaca'aj tijin:

—Tavástara', mu paj jì'réenya'aj séejre', pajta quee tyi'tíj jin á'itzeere', ¿a'náj nyij pahuá'xijtye'en a'íjma i maj cháanacaj japua jo'cháatimee, a'íjna jime' i maj táacuj?

¹¹ Aj mu mij cáanarij tyihuo're'pij ti tyi'titi'ijmee ti tyí'cueenaa, majta a'yan tyihuo'té'exaaj maj cǎ tyityahuóoso'pe'en, 'asta mana'aj quee huo'néijmi're'en i hua' ihuáamua', i maj majta tyí'huiire' i Dios jimi, mej mij a'yan cha'taj mana'aj éenye'que' huácu'nyij mat'ij a'íimaj.

¹² Ti'ij a'íjna i cánya'aj i ta'ráseevij ajsújtza'an, aj nu nyij jaaséj ti cháanacaj ca'nyíin jin huatóoca'tzij. Ajta i xicáj huatyáxu'muariaca', a'yaa pu huasé'rihua'aj ti'ij i cíixurij ti xú'muaa, ajta a'íjna i máxcirie' huatyápo'xariaca', a'yaa pu huasé'rihua'aj ti'ij xúure'ej, ¹³ majta i xú'ra'vetyee a'íi mu uje'cáavatzij i chuéj japua, a'yájna ti'ij i táque'ra' i xápua' tipua'aj i ciyáara' ca'nyíin jin huatáhuaaxi'in i áacaj jime'. ¹⁴ Ajta i tajapuá a'yaa pu huataséjre ti'ij tipua'aj a'táj yu'xarij huatyéjire'en, ajta néijmi'i i jiríj ti huaquéetimee, ajta jo'tij ja'rahuáchijmee i jájtyij japua, néijmi'i pu aja'yee jo'quéetima'aj ta'raa. ¹⁵ Majta néijmi'i i maj tyi'táj jin tyityatatyíj, a'íi mu huatyóo'avaataca' tyásta'naj tzajta', majta tyetyéj tzajta' nusu i jiríj jitze, hua' jamuán i tajtúhuaanyij, i maj tyihua'ijtye' i xantáaru'uj, i maj chíjtyaanyl'ij pué'een, majta i maj va'cán jin tyityatatyíj, néijmi'i i maj ca'nyéjrij jin tyí'huiiria'ca'aj majta i juxáahuaj séjria'ca'aj, ¹⁶ a'yaa mu tyihua'jeevaca'aj i jiríj majta i tyetyéj tíjin:

—Siata'aj tajapuá rájvetyij siaj sij ta'vá'naj ti'ij quee taaséj a'íjna i ti acájca i ipuárij jitze, ajta ti'ij quee puéjtzij táaci'tyij a'íjna jime' i cánya'aj

ti jin nyú'camui'. ¹⁷ Ji'nye pu'ríj tya'rá'aj a'ájna xicáara' maj jitzán puéjtzij taatá'sij, ¿a'tanyíj pújoorej tí'ij tyo'táviicue'en a'ájna jime'?

7

A'íimaj i maj Israel jitze ajtyáma'can i Dios ti hua'vá'jajpuaxij

¹ Nyajta je'en muáacuacaa huaséj i maj tajapua' tyí'huiire', maj a'áa jo'tyú'uuca'aj, síj pu a'áa jo'tyávaaca'aj jo'tij i xicáj jé'ejnyinyiij, ajta síj jo'tij i xicáj ja'ancáru'pij, ajta síj ajtyapuáj pujmua', ajta i síj áatyej pujmua' pu jo'tyávaaca'aj, a'íi mu mij quee tyi'tá'care'ej ti huatá'aacarej i chuéj japua, na'ríij i jájtyij japua nusu i ciyéj tzajta'. ² Nyajta nu séej huaséj i ti tajapua' tyí'huiire' ti a'áa pujmua' ja'vá'ma'ca'aj jo'tij jé'ejnyinyiij i xicáj, a'íi pu ji'tyátijcaa a'ájna i ti jin hua'ajtyiyú'xaxi'in i huá'cuatze' i tyeítyeristyamua'me'en i Dios ti júurij. A'íi pu'ij ca'nyíin jin huo'tajé a'íimaj i maj a'ájna jin antyúumua'reeriaca'aj maj je'ej pua'aj jáa'uurej i cháanacaj, majta i jájtyij ti ve'éj. ³ A'yaa pu tyihuo'té'exaaj tijin:

—Caxu je'ej pua'aj ja'uurej i cháanacaj, i jájtyij ti ve'éj, nusu i ciyéj, 'asta tyana'aj quee hua'ajtyiyú'xaxi'in huá'cuatze' a'íimaj i maj jahuiire' i taj Dios.

⁴ Nyati'ij nyij jáanamujri' a'chu maj ará'axcaa i maj hua'ajtyiyú'xaxij, a'yaa mu pua'maca'aj anxityej japuan huá'puatyej japuan muáacuaj ví'ra'aj, a'íi mu a'íin pué'een i maj Israel jitze eeráma'can. ⁵ Tamuáamuata' japuan hua'puaj

ví'ra'aj mu pua'mácan ajtyiyu'xaxij i maj Judá jitze eeráma'can, majta tamuáamuata' japuan hua'puaj ví'ra'aj i maj a'íjna jitze eeráma'can i Rubén, majta tamuáamuata' japuan hua'puaj ví'ra'aj i maj a'íjna jitze eeráma'can i Gad, ⁶ majta tamuáamuata' japuan hua'puaj ví'ra'aj i maj Aser jitze eeráma'can, majta tamuáamuata' japuan hua'puaj ví'ra'aj i maj a'íjna jitze eeráma'can i Neftalí, majta tamuáamuata' japuan hua'puaj ví'ra'aj i maj Manasés jitze eeráma'can, ⁷ majta tamuáamuata' japuan hua'puaj ví'ra'aj i maj Simeón jitze eeráma'can, majta tamuáamuata' japuan hua'puaj ví'ra'aj a'íimaj i maj Leví jitze eeráma'can, majta tamuáamuata' japuan hua'puaj ví'ra'aj i maj Isacar jitze eeráma'can, ⁸ majta tamuáamuata' japuan hua'puaj ví'ra'aj i maj Zabulón jitze eeráma'can, majta tamuáamuata' japuan hua'puaj ví'ra'aj i maj José jitze eeráma'can, a'yaa mu cha'taj mana'aj tamuáamuata' japuan hua'puaj ví'ra'aj tyitya'rá'axcaa i maj Benjamín jitze eeráma'can.

A'íimaj i maj jéehua ará'asej majta cuéeinavi' tyi'tyéechan

⁹ Nyati'ij nyij nyajtáhua'aj atányeeriaca', aj nu nyij mui'caa huápuí'ij hua'sej i tyeítýee i maj a'áa ja'tyúusiiria'ca'aj néijmi'i i maj séej chuéj japua já'ma'can, majta séej chájta'naj jitze já'ma'can, majta i maj seequéj tyu'xáxa'aj, jéehua mu huápuí'ij ará'axcaa a'íj pu jin quee i'riitaca'aj ti a'tíj huo'tyé'iten. A'áa mu jo'tyú'uuca'aj i cánya'aj jimi. A'íi mu cuéeinavi' tyi'tyáchajcaa,

majta tacíj iityepíitima'caa. ¹⁰ Néijmi'i mu ca'nyíin jin a'yan tyí'tyejijhuaca'aj tijin:

A'íjna i ti jin tajapuá huanyú, a'íj pu jimi já'ma'can i taj Dios

i ti acájca i ipuárij jitze, ajta a'íjna jimi i cánya'aj.

¹¹ Majta néijmi'i i maj tajapuá tyí'huüre', a'íi mu ataváatima'caa jo'tij jo'tyéjvee i ipuárij, majta i huásij, majta a'íimaj i maj muáacuaj i maj júurij, a'íi mu mij ecóotutaxij jimi i ti acájca i ipuárij jitze, matí'ij mij jaatyánajchaca' i Dios, ¹² a'yaa mu tyu'taxájtaca' tijin:

Che' a'yan tyá'ra'nyij.

I tyaj jimi tyu'táchuiicaj, ajta i ti naa een, i ti néijmi'i tyí'mua'reej, i tyaj jin tyé'tyojtzi're', a'íj pu jimi já'ma'can i Dios i jusén jime' séejre'. Che' a'yan tyá'ra'nyij.

¹³ Aj pu'ij sáij i vásti' a'yan tyinaata'íhuo'ri' tijin:

—¿A'tyaanyíj maj pué'een a'múumaj mu maj cuéeinavi' tyu'cháatimee, ajta jo'nyij ma'ráacij?

¹⁴ Nyati'ij nyij a'yan tyaaté'exaa tijin:

—Muáaj paj vásti' jamua'reej. Aj pu'ij a'yan tyinaaté'exaa'ij tijin:

—A'íi mu a'íin pué'een i maj tyo'táviicue'ri' i maj jéehua jaapuéjtzitariaca', a'múu mu meríj tyu'jó'sij i tyúucaanaa, majta tyu'cueenarej i tyúucaanaa a'íjna jime' maj ja'antzaahua'aj i Ciriístu' ti hua' jitze ma'can huamuí'. ¹⁵ A'íj mu jin a'áa já'sejre' jo'tij jóonyee i ipuárij ti jitzán acájca i Dios, majta a'náj tina'aj jahuüre' i tyeyúuj tzajta', tújca majta tíca'. Ajta i ti

acájca i ipuárij jitze, a'íi pu hua'cha'íij a'íjna jime' ti hua' jimi huatyá'itzeerej. ¹⁶ Camu che' huatatújritze'ej, camu majta che' huataí'icuj, capu che' i xicáj hua'tátzavi'tye'ej ja'mej, capu ajta hua'téexi'raj ja'mej i xicáj, ¹⁷ ji'nye a'íi pu i cánya'aj i ti a'áa jé'ta' já'sejre' a'íi pu hua'cha'íij ja'mej, a'íi pu'ij huá'vi'tin jo'tij ja'rájmuaa i maj jin júurij muá'ra'nyij, ajta i Dios pu tyámua' tyihuo'tyéjeevij, mej mij quee che' tyi'tíj jin juxaamuijritya'aj.

8

I ti aráahua'puaj i ti ájvi'tyijhuaca'aj ajta i cítzive'rij

¹ Tí'ij i cánya'aj ja'ajsújtza'an i ti ajvi'tyíhuajma'caa, a'íjna i ta'ráahua'puaj, aj pu'ij tyu'puá'riajraa u tajapuá, jé'ta' ooraj pu á'tyeej ti'quee tyi'tíj namuajria'ca'aj.

² Aj nu nyij tányij arahua'puácaa huaséj i maj tajapuá tyí'huüre' maj jimi i Dios ajo'tyú'uuca'aj, a'íi mu mij tya'ancurá'ij i trompéetaj aráahua'puaj ti tya'rá'asej. ³ Aj pu'ij ajtáhua'aj síij mujo've'mej ti ajta tajapuá tyí'huüre', a'íi pu cítzive'rij iityájajnaca'aj, aj pu'ij jitzán ajtyéechaxij i maj japuan tyí'mu'vejritacaa, majta je'en íjicua jéehua jaatá' tí'ij ja'antyítieeraj a'íjna i maj japua i maj japuan tyí'mu'vejritacaa ooroj ti jin taavijhua, ti a'áa já'sejria'ca'aj jo'tij jo'tyéjvee i ipuárij, jamuán i maj jin jahuooca'aj i Dios jimi. ⁴ Aj pu'ij ájcitzujtariaca' a'íjna i íjicua i muáca'ra'an jitze i ti tyí'huüre' u tajapuá,

'asta na'aj quee a'áa ja'rá'aj jo'tij já'sejre' i Dios, ajta pu ará'aj a'íjna i nyúucarij i maj jin jahuoca'aj i tyeítyeristyamua'me'en i Dios. ⁵ Aj pu'ij a'íjna i ti tajapuá tyí'huüre' jájti i cítzive'rij, ajta ja'vá'jistej i ti'ixcuáa a'áa ti já'ma'can a'íjna japua i maj japuan tyí'mu'vejritaca, aj pu'ij a'áa yo'cáaxirej i cháanacaj japua, aj nu nyij a'yan tyáanamujri' ti'ij maj huatyényuunyij, ajta jéehua tyi'tyáhuaasime'ej, majta tyána'axcava'ra'aj, ajta je'en huatóoca'tzij i cháanacaj.

A'íjna jime' i trompéetaj maj tyi'tyái'ca'aj

⁶ Majta a'íimaj i maj aráahua'puaj ará'asej i maj tajapuá tyí'huüre' i maj trompéetaj tyi'tyái'ca'aj, a'í mu tyámua' huóoruuj mej mij a'íjna tzajta' ucáajijhua.

⁷ Ajta a'íjna i ta'nájcaj, a'í pu ucáajijhuaca' a'íjna jitze i trompéetaj, mati'ij mij tyéetyee cáavatzij jamuán i tiéj xúure'ej ti á'naxcaj. Aj pu'ij japuan ráavatzij i cháanacaj, ajta je'en je'cáj tyu'rá'taa i ciyéj, ajta i tu'píj ti huá'raa néijmi'i pu huariá'taj.

⁸ Ajtáhua'aj síj i ti tajapuá tyí'huüre', a'í pu ajta ucáajijhuaca' a'íjna tzajta' i trompéetaj, aj pu'ij tyi'tíj atyájrre i jájtyij jitze ti ve'ej, a'yaa pu huasé'rihua'aj ti'ij jiríj ti tyátaasima'aj, aj pu'ij je'cáj i jájtyij a'yan huaríj ti'ij i xúure'ej. ⁹ Majta je'cáj huácuij i jáata' maj tyityá'xoo, majta i báarcuj i maj japuan á'ciinyaca'aj i jájtyij, a'í mu huatyána'xij.

¹⁰ Ajtáhua'aj i ti je'tyáa'sej i ti ajta tajapuá tyí'huüre', a'í pu ajta ucáajijhuaca' a'íjna jitze i

trompéetaj, aj pu'ij xú'ra'vej ti ve'éj uje'cájvej, a'yaa pu tyá'taaca'aj ti'ij tatzárij, aj pu'ij aja'rájve je'cácaa japua i játya'naj, ajta je'cácaa japua jo'tij ja'ajéexavi'ijmee. ¹¹ Ajta i xú'ra'vej a'yaa pu ántyapuaaca'aj tijin Ta'antzíjvi, aj pu'ij je'caj i jájtyij antzíivi'ij ta'raa, a'íj mu mij jin mue'tíj huácuij i tyeítjee, a'íjna jime' i jájtyij ti antzíjvi.

¹² Ajta je'en i ti muáacuaj jitze je'tyáa'sej i ti ajta tajapuá tyí'huüre', a'íi pu ajta ucájijhuaca' i trompéetaj jitze, aj pu'ij je'ej pua'aj huaríj i xicáj, ajta i máxcirie', majta je'cáj i xú'ra'vetyee. A'íj pu'ij jin huatyática'riaca', ji'nye camu che' á'taaca'aj i tújca nusu tíca'.

¹³ Nyati'ij nyij ajóonyeeriaca'aj, nyati'ij cué'ra'vej huánamuajri' ti jútye' imuáj já'ra'ra'ca'aj, ajta ca'nyíin jin a'yan tyí'xajtaca'aj tijin:

—¡Cuí' xaa, cuí' xaa, cuí' xaa, a'íimaj i maj japuan huacháatimee i cháanacaj, ji'nye jéehua mu jajpuéetzij muá'ju'un mati'ij ucáajijhua i trompéetaj jitze a'íimaj i maj huéeicaj i maj tajapuá tyí'huüre'!

9

¹ Aj pu'ij i ta'anxíviij ucájijhuaca' i trompéetaj jitze, aj nu nyij xú'ra'vej huaséj ti uje'cájvej u jútye', ti'quij cháanacaj japua ja'rájvej, aj pu'ij ja'ancuré'chuij i ti jin tya'antácuunaj jo'tij ja'tyácun tiquee ámiteere' a'chu ti jo'cátyeej. ² Aj pu'ij ja'antycúj jo'tij ja'tyácun tiquee ámiteere' a'chu ti jo'cátyeej, aj pu'ij ájcítzujtariaca' ti'ij i oornaj ti ve'éj, ajta i

xicáj, ajta i máxcirie', a'íi mu ootanámi'huaj muá'raa a'íjna jime' i citzíj. ³ Aj mu mij vítzi'see huataséjre i citzíj tzajta', majta je'en néijmi'que' i cháanacaj japua huataséjre, a'yaa mu tyihuo'tá' mej mij tyú'che've'en mati'ij i tyaxcáj. ⁴ A'yaa mu tyihuo'ta'íj maj quee je'ej pua'aj ja'uurej i tu'píj ti ajnyéj i chuéj japua, na'ríij ixáj tyi'tíj nusu ciyéj, sulu mej mij a'íjma mana'aj je'ej pua'aj huá'uurej i tyeítyee i maj quee ajtyiyu'si'huajmee i jucuaátze' maj tyeítyeristyamua'me'en pué'een i Dios. ⁵ Majta quee a'yan tyihuo'tá' maj huó'cui'nyij i tyeítyee, sulu mej mij puéjtzij mana'aj huo'tá'an a'chu anxí máxcirie', ajta i maj jin puéjtzij huo'ta', a'yaa pu tyihuá'cui'ca'aj tí'ij tipua'aj tyáxcáj jaache'en. ⁶ A'ájna xicáara' jitze a'íi mu i tyeítyee jahuonyij mej mij huá'cui'nyij, ajta capu je'ej tyu'tái'riitarij, jéehua mu huápu'íj jaxie'va'aj muá'ju'un maj huá'cui'nyij, ajta quee je'ej tyu'tái'riitarij sulu a'yaa tya'ajpuéetzij muá'ju'un.

⁷ Majta i vítzi'see, a'yaa mu huasé'rihua'aj mati'ij i cahuáayu'uj i maj meríj hua'cáanaxij mej mij huanyo'se'en, tyi'tíj mu ucarújtya'ajma'caa i jumu'új jitze, a'yaa pu huasé'rihua'aj tí'ij cúruun ooroj ti jin taavijhua, ajta i hua' nyéerimij a'yaa pu huasé'rihua'aj tí'ij tyévij. ⁸ A'yaa mu majta tyityacácipuaca'aj mati'ij úucaa, ajta i hua' tamej a'yaa pu huasé'rihua'aj tí'ij i muájyej tamej. ⁹ Majta néijmi'que' canami'huajma'caa tyi'tíj jime' ti tyapúusti' pue'éenye'ej, ajta mati'ij ra'ra'ca'aj

a'yaa pu namuajria'ca'aj i hua'anaj ti'ij i cariaata' cahuáayu'uj maj ju'va'jáapuajmee i maj jitzán aru'uj i maj nyo'se'. ¹⁰ Ajta i hua'cuasij a'yaa pu éenye'ej ti'ij tyáxcaj cuasij, a'íj pu'ij jitze séjria'ca'aj i maj jin a'yan á'tyeeren anxí máxcirie' mej mij puéjtzij huo'tá'an i tyeítyee. ¹¹ Ajta i ti tyihuá'ijtye' i vítzi'see, a'íi pu a'íin pu'éen i júuricamej ti néijmi'i jin antyúumua'reej a'ájna jo'tíj ja'tyácun tiquee ámiteere' a'chu ti ajo'cátyee, a'yaa pu ántyapuaj huá'nyuucaa jime' i Hebreos tijin Abadón ajta huá'nyuucaa jime' i Griego a'yaa pu ántyapuaj tijin Apolión.

¹² Pu'ríj síj mu jo'mej i maj jin jajpuéetzij muá'ju'un, ajta óoche' hua'puaj tyá'itzeere' i ti a'yan tye'mej.

¹³ Aj pu'ij i ti tajapuá tyí'huiire' i ti arájseej, a'íi pu ajta ucáijhuaca' i trompéetaj jitze, aj nu nyij a'tíj huánamuajri' ti a'áa tyajá'xajtaca'aj jo'tíj jo'tyéjvee a'íjna i maj japuan tyí'mu'vejritacaa ti a'áa já'sejria'ca'aj i Dios jimi. ¹⁴ A'yaa pu'ij tyaaté'exaa a'íjci i ti tajapuá tyí'huiire' tijin:

—Pata'aj hue'ejxixij a'íimaj i maj muáacuaj i maj eetyánami' a'ájna véjri' játya'naj jitze ti ve'éj ti a'yan ántyapuaj tijin Éufrates.

¹⁵ Aj pu'ij hue'ejxixij a'íjma i maj muáacuaj, mej mij i huó'cui'nyij je'cácaa i tyeítyee i maj a'yan huacháatimee i cháanacaj japua, ji'nye a'íi mu tyámua' éenye'ej mej mij a'yan huárinyij a'ájna xicáara' jitze, a'íjna máxcirie' jitze, ajta a'íjci jitze i nyinyi'ra'aj. ¹⁶ Majta i xantáaru' i maj avé'tye'tye'ej, a'yaa nu tyáanamujri' maj

hua'puaj anxityej ti séej ví'ra'aj ti ara'ástimee ará'axcaa.

¹⁷ A'yaa nu nyij tyihuo'séj i cahuáayu'uj, majta i maj avé'tye'tye'ej, a'íi mu antyóonajca'aj i jutavíj jitze tyi'tíj jime' ti a'yan huasé'rin ti'ij tiéj, ajta cuatúmua ajta tyóomuaa jamuán. Majta i cahuáayu'uj, a'yaa mu eenye' ijmu'ujma'caa mati'ij muajyéj, ajta i hua' tyenyij jitze pu éejnyinyiica'aj i tiéj jamuán i citzíj, ajta tyi'tíj ti tyóomuaa ti a'yan tyáarie' ti'ij tyapúusti'. ¹⁸ A'íj mu jin je'cáj huácuij i tyeítjee a'íjna jime' i tiéj, ajta i citzíj, ajta a'íjna i ti a'yan tyaarie'ej ti'ij tyapúusti' i ti éejnyinyiica'aj i hua' tyenyij jitze i cahuáayu'uj. ¹⁹ Ji'nye a'íjna i maj jin jaayí'tin mej mij tyityáacui'nyij a'íi pu hua' tyenyij jitze séjria'ca'aj, ajta i hua'cuasij jitze, ajta i hua'cuasij a'yaa pu huasé'rihua'aj mati'ij cú'cu'see, majta jumu'új jin je'ej pua'aj huá'uuriajca'aj i tyeítjee.

²⁰ Majta i séecan i tyeítjee i maj quee huácuij a'íjna jime' i cui'nyi'ra'aj, camu jaatapuá'citaca' maj je'ej pua'aj rijcaa, nusu maj janajchej i tyiyáaru', majta i sánturij ooroj maj jin taav-ijhua, nusu pláataj jime', nusu coobre jime', ca' tyetyéj jime', nusu ciyéj jime', i maj quee iityanamúáarajmee majta quee rácijci'nyive'.

²¹ Camu majta jaatapuá'citaca' i maj quee che' tyí'tyacui'caj, nusu maj quee che' tyi'chahueeraj, camu majta jaatapuá'citaca' maj tyí'xana'cire'ej, nusu maj tyí'nahua'aj.

10

A'íjna i ti tajapuá tyí'huüre' ajta i yu'xarij ti

jíri'

¹ Nyati'ij nyij nyajtáhua'aj séej huaséj i tajapuá ti tyí'huüre', ti va'cán jin antyúumua'reej, a'íi pu jútye' aje'cáma'ca'aj ajta jéetirij je'cánajca'aj, cu'xa'aj pu ajta atahuíjca'aj i mu'úura' jitze, a'yaa pu i nyéerima'ra' tya'tátaave'ej ti'ij i xicáj, ajta i icájra'an a'yaa pu huasé'rihua'aj ti'ij tyi'tíj ti tyátaasij. ² A'íi pu yu'xarij iityépijca'aj i jumuáca' jitze ti cále'en, aj pu'ij i ju'íicaj jumuáca'ta' ti pujmua' jin ará'íicataca' i jájtyij japua ti ve'ej, ajta i chuéj japua ará'íicataca' i séej jime' i ju'íicaj útata' ti pu-jmua'. ³ Aj pu'ij ca'nyíin jin huajíjhuaca', a'yaa pu namuajria'ca'aj ti'ij muájyej ti ji-jhuaca'aj, ti'ij huajíjhuaca', aj mu mij víityee huatanyúj aráahua'puaj pua'máj. ⁴ Mati'ij a'yan tyityaatanyúj i víityee aráahua'puaj pua'máj, nyáaj nu jo'tyeyu'xajche', nyati'ij nyúucarij huánamuajri' ti jútye' nyojo'tajé a'yan tíjin:

—Pata'aj jú'mua'reeriaj je'ej maj tyu'taxájtaca' i víityee maj huatyéenyuj aráahua'puaj pua'máj, capáj ja'yu'xaj.

⁵ Ajta i tajapuá ti tyí'huüre' i nyaj jaaséej ti jájtyij japua ja'rá'íicataca', ajta chuéj japua ajta ja'rá'íicataca', a'íi pu ajmécja'taca', ⁶ ajta a'yan tya'tóoratziiri' nyúucaritze' a'íjna i ti jusén jin júurij, i ti jaatyátaahuaca' i tajapuá ajta i cháanacaj, ajta a'íjci i jájtyij ti ve'ej, ajta i maj jitzán tyityá'xoo. A'yaa pu tyu'taxájtaca' tíjin:

—Pu'rij ajtyojo're'nyesij a'ájna xicáara' ti jitzán néijmi'i tye'entyipua'rij, ⁷ a'ájna pu aty-ojo're'nyesij ti'ij ucáajijhua i ti tajapuá tyí'huüre'

i ti aráahua'puaj pué'een, aj pu'ij néijmi'i tya'róo'astesij a'íjna i ti ju'avaaj i Dios jimi, ajta je'ej ti a'ín tya'tóoratziiiri' a'íjma jimi i maj jahuúria'ca'aj.

⁸ A'íjna i nyúucarij i nyaj jáanamujri' ti jútye' tyajá'xajtaca'aj, a'yaa pu ajtáhua'aj tyinaaté'exaaj tíjin:

—Áricuj a'íjci jimi i tajapuá ti tyí'huiire' pata'aj ja'ancuráain i yu'xarij ti ji'tyíi' i jumuáca'ta' pujmua' i ti jájtyij japua rá'íicaj ajta i chuéj japua.

⁹ Aj nu nyij ujó'mej a'íjci jimi i tajapuá ti tyí'huiire', nyati'ij nyij jaatáhuaviiri' ti naatí'tye'en i yu'xarij ti cíleen, a'yaa pu'ij tyinaaté'exaaj tíjin:

—Yana'cuíj pata'aj jaatyájci'mej. A'yaa pu mua'mé'ra'catye'ej ta'mej mua' tyényi'tze' mati'ij sarátyee, ajta mua'tziivi'tye'ej ta'mej mua' jucáatze'.

¹⁰ Nyati'ij nyij ja'ancurá'ij a'íjci i yu'xarij ti cíleen i muáca'ra'an jitze a'íjna i ti tajapuá tyí'huiire', nyati'ij nyij jaatyájci'cij, naa pu tyinu'cacarejca'aj i nyetyényij jitze tí'ij sarátyee, ajta nyati'ij yo'xij, a'íi pu na'ra'tziivi'riaajraa i nyajucáa jitze. ¹¹ Aj mu mij a'yan tyinaaté'exaaj tíjin:

—A'yaa pu tyúuxie've' paj tyihuo'té'exaatye'en a'íimaj i tyeíttee i maj séej chuéj japua já'ma'can, ajta i maj séej nyúucarij jin tyí'xaj, pajta a'íjma i maj tyihuá'íjtye'.

11

A'íimaj i maj hua'puaj i maj tyámua' tyí'tíj tyí'mua'reej

¹ Aj mu mij tyí'tíj ciyéj naatáchuij i maj jin tyí'ite'raaca a'chu ti huatátyeej, majta a'yan tyinaaté'exaaj tijin:

—Ájchesij pajta jaatyé'iten a'chu ti ve'éj i tyeyúuj i Dios ti ja'a'rij, pajta a'íjci a'chu ti ooyóhuaaj i maj japuan tyí'mu'vejritacaa, pajta je'en huo'tyé'iten a'chu maj ará'asej i maj jana-jchej. ² Ajta capáj ja'iteej a'chu ti antayóhuaaj a'ájna a pua'quéj a ti ja'rájta'cuaj, ji'nye a'íjma mu huatátuui i maj quee tyá'tzaahuatye', mej mij a'íimaj huá'puatyej japuan hua'puaj máxcirie' je'ej pua'aj jáa'uurej i chájta'naj ti naa een. ³ Nyáaj nu hua'puácaa huata'ítij, i maj quee naa eenye' tyí'tyéechan, mej mij a'íimaj tyihuo'té'exaatye'en i Dios jitze ma'can, a'yan mua'tyéevi'ij a'chu séej ví'ra'aj japuan hua'puaj anxityej japuan huéecatyej xicáj.

⁴ A'íimaj i maj hua'puaj a'íi mu a'íin pué'een i maj hua'puaj i maj antyitátzajmee majta i aseitúunaj ti hua'puaj ti jimí aja're'vej i tavástara' jimi ti íiyan tyí'ijta i cháanacaj japua.

⁵ Tipua'aj a'tíj je'ej pua'aj huá'uuriajmuí'ij, hua'tyenyij jitze pu i tiéj éejnyinyii, a'íj mu mij jin huo'tyátieeraaj i maj hua'ajcha'íire', a'yaa mu mij tyí'tyacui'nyij a'íimaj i maj a'yan tyá'xie've' maj je'ej pua'aj huó'uurej. ⁶ A'íimaj i maj hua'puaj, a'íi mu jaayí'tin mej mij huo'tá'ijmuaj i víityee mej mij quee che' viiyej meentyij móoj tyihuá'ixaatye' i tyeítiee i Dios jitze ma'can,

majta mu jaayítin mej mij seequéj jáa'uurej i jájtyij tí'ij a'yan huárinyij tí'ij xúure'ej, ajta maj puéjtzij huo'tá'an a'íimaj i tyeítýee i maj a'yan séejre' i cháanacaj japua, néijmi'i jime' i cui'nyi'ra'aj, a'chu maj a'íimaj a'yan tyá'xie've'.

⁷ Ajta mati'ij ja'antýipúa'ritye'en i maj nye jitze ma'can tyu'taxájtaj, aj pu'ij tyi'tíj a'áa je'taméj jo'tij ja'tyácun i tíquee ámiteere' a'chu tí jo'cátýeej, aj pu'ij huo'tanyó'si'tye'sij, ajta je'en huo'tyámue'tij tí'quij huá'cui'nyij. ⁸ A'áa mu ja'séeria'aj muá'ju'un i mui'chítýee a cáayej jitze a'ájna i chájta'naj jitze tí ve'éj tí a'yan tyaja'rájtyapuaaj tíjin Sodoma ajta Egipto, jo'tij ajta i hua' vástara' jó'tateehuaca' i cúruuj jitze. ⁹ Majta huéicaj xicáj japuan jé'ta' á'tyeeren maj hua'séeraj muá'ju'un i mui'chítýee a'íimaj i tyeítýee i maj a'yan huacháatimee néijmi'que' i cháanacaj japua, i maj séej nyúucarij jin tyí'xaj, majta i maj séej chuéj japua jo'cháatimee, jí'nye camu huo'ta'sij maj tyityáa'avaataj. ¹⁰ Majta a'íimaj i maj íiyan huacháatimee i cháanacaj japua, a'íi mu huatóotyamua'vej a'ájna jime' i maj meríj huá'cuii. A'íi mu huápuí'ij huatóotyamua've'sij metýí'ye'estyaj, majta tyu'tóopuejve'sij séej jamuán majta séej, jí'nye a'íimaj i maj hua'puaj i maj Dios jitze tyí'xaj jéehua mu huápuí'ij huá'itziitya'ca'aj. ¹¹ Ajta tí'ij huéicaj xicáj japuan jé'ta' tyoomá'caj, Dios pu huo'tájuurityej aj mu mij ájhuiixij i maj meríj huácuí'ijcaa, majta a'íimaj i maj huo'séj jéehua mu tyu'tátziin. ¹² Mati'ij mij a'íimaj i maj hua'puaj nyúucarij

huánamuajri' ti ca'nyíin jin uje'cánamuajrej u jútye' a'yan tijin:

—Xié'ejciinyij a'yájna.

Aj mu mij jéetirij jitze tyicíj, mahua'raséeracaj i maj hua'ajcha'íire'. ¹³ Aj pu'ij ca'nyíin jin huatóoca'tzij i cháanacaj, a'íj pu jin á'vatzij i tyihuá'chi'ij i chájta'naj jitze majta aráahua'puaj ví'ra'aj i tyeítyee huácuij. Majta a'íimaj i tyeítyee i maj quee huácuij, jéehua mu tyi'tzínnye'ej metyaatatyójtzi'rej i Dios tajapúa ti já'sejre'.

¹⁴ Pu'ríj mu jo'mej i ti hua'puaj i maj jin jaapuéjtzitariaca', ajta pu'ríj ajtyojo're'nyesij i ti huéeicaj i maj jin majta jajpuéetzij muá'ju'un.

I trompéetaj ti aráahua'puaj

¹⁵ Aj pu'ij i ti tajapúa tyí'huiire' i ta'ráahua'puaj, a'íi pu ucájijhuaca' i trompéetaj jitze, aj nu nyij nyúucarij huánamuajri' ti ca'nyíin jin atyojo'taxájtaca' u jútye' a'yan tijin:

A'íjna i ti tyí'ijta íyan cháanacaj japua a'íi pu arí a'íin pué'een i Dios ajta i tavástara', a'íi mu tyi'ítaj muá'ju'un jusén jime'.

¹⁶ Majta a'íimaj i huásij i maj seityéj japuan muáacuaj ará'asej i maj majta ju'ipuáa japua acáatyij i Dios jimi, a'íi mu ecóotutaxij majta je'en jaatyánajchaca' i Dios, ¹⁷ a'yaa mu tyu'taxájtaca' tijin:

Tyetyi'muatyójtzi're', tavástara', Dios mu paj néijmi'i jin antyía'mua'reej, mu paj jájcuaj ímuáj séjria'ca'aj pajta ijíj séejre', ji'nye muáaj paj períj va'cán jin tye'entyájrupij, pajta períj huatye'chej pej pij tyu'ta'íjtaj.

18 Majta a'íimaj i maj séej chuéj japua já'ma'can
 jéehua mu huatanyínyu'cacuca',
 ajta arí tya'rá'aj a'náj paj pajta muáaj hu-
 atanyú'caj,
 pu'ríj atyojo're'nyej a'ájna xicáara' paj jitzán
 huá'xijtye'en a'íimaj i maj meríj huácuij,
 pajta tyámua' tyihuo'tá'sij a'íijma i maj a jitze
 ma'can tyí'xaj,
 majta i maj muéetzij jimi tyámua' tyí'tyesejre',
 majta a'íimaj i maj a'jimi tyá'tzaahuatye',
 tipua'aj i maj va'cán jin tyityatatyíj, na'ríij
 cíléenye' jin metyityatatyíj,
 pajta hua'antypua'ritye'sij a'íijma i maj je'ej
 pua'aj ja'uurej i cháanacaj.

19 Aj pu'ij i tyeyúujra' i Dios i tajapua' ti já'sejre'
 antacúj, ajta i tyeyúuj tzajta' pu séjria'ca'aj a'íjna
 i chí'ij ti cíleen ti ajta tzajta' séejre' i nyúucarij ti
 jin i Dios tya'tóoraj. Majta huatyána'axcava'xij
 majta tyényuuca'aj, ajta huatóoca'tzij i chuéj,
 majta jéehua tyéetyee cáavatzij.

12

I íiti' ajta i cú'cu'uj

¹ Aj pu'ij tyi'tíj huataséjre u jútye', íiti'
 pu huataséjre ti cáanarij tyí'chajca ti naa
 tyi'tyatáatiyi'ij tí'ij xicáj, ajta máxciríe'
 japua újvaaca'aj a'íjna i íiti', ajta cúruun
 ucárujtya'ca'aj maj jitzán tamuáamuata' japuan
 hua'puaj i xú'ra'vej séjria'ca'aj. ² Ajta jútza'ca'aj
 a'íjna i íiti', a'íj pu jin juyiinnyaca'aj a'íjna
 jime' ti já'cui'ca'aj, jí'nye pu'ríj tin tyiyóoj
 ta'mej. ³ Ajtáhua'aj síij tyi'tíj huataséjre

u jútye', cúcu'uj pu huataséjre ti po'vij ti vivéj, ajta arahua'puácaa íjmu'uj, ajta tamuáamuata' pua'mácan ava'ahuájmeé, ajta je'en cúruun ucarújtya'ajma'caa i ju'a'huáj jitze i ti aráahua'puaj ará'asej. ⁴ Ajta i jucasíj pu jin hua'curia'naj je'cácaa i xú'ra'vej i maj jútye' já'sejre', ti'quij huaje'cáahua'xij i cháanacaj japua. Ajta je'en i cú'cu'uj, a'áa pu jo'tyéechaxij a'íjci jimi i íiti' ti arí tin tyiyóoj ja'mej ta'aj ij jaatyájci'mej ti'ij huanie'huaaj i yójra'. ⁵ Aj pu'ij tyiyóoj ta'raa tyáatacan a'íjna i íiti', a'íi pu a'ín pue'een i ti ca'nyéjrij jin tyihuo'ta'íjtye'sij mati'ij mana'aj pua'máj a'yan séejre' i cháanacaj japua. Ajta a'íjci i yójra' i íiti' Dios pu yo'ví'tij u tajapuá jo'tij a'ín já'sejre' ajta jo'tij a'ín jo'tyájcay i ipuárij jitze, ⁶ aj pu'ij i íiti' huatoo'uj a'ájna jo'tij quee já'tyi'tij, jo'tij ajta Dios tyámua' yo'uurijtze mej mij a'áa tyiyo'cue'tyej séej ví'ra'aj japuan hua'puaj anxityej japuan huéecatyej xicáj jitze.

⁷ Mati'ij támij huatyóohuij maj huatyényo'se'en u tajapuá, a'íjna i Miguel majta i maj jamuán tyí'huíire', a'íj mu jimi nyo'sa'ca'aj i cú'cu'uj, majta jamuán i maj jahuíire' i cú'cu'uj, ⁸ majta quee capu tyu'mué'tij i cú'cu'uj, camu majta i maj jahuíiria'ca'aj, a'íj mu jin quee che' huo'ta' maj tajapuá jo'tyú'uucay. ⁹ Mati'ij mij uye'cájriee a'íjci i cú'cu'uj ti vivéj, a'íjna i cú'cu'uj ti jájcuaj ímuáj séjria'ca'aj, a'íjna i tyaj a'yan jatamuá'muaj tíjin tyiyáaru', i ti huá'cuanamuaj néijmi'caa i maj a'yan séejre' i cháanacaj japua. Aj mu mij uye'cájriee íyan i cháanacaj japua, jamuán i maj jahuíiria'ca'aj.

¹⁰ Aj nu nyij nyúucarij huánamuaajri' ti ca'nyiin jin utyojo'taxájtaca' u tajapuá a'yan tijin:

—Pu'ríj tya'rá'aj a'náj maj tajapuá huatányuusij, a'íjna i ti néijmi'i jin putyí'uurej, ajta i ti jin tyu'ta'íjtaj i Dios, pu'ríj néijmi'i jin tyu'ta'íjtaj a'íjna i Ciríistu', ji'nye pu'ríj ayo'cájree a'íjna i ti je'ej pua'aj huá'uuriajca'aj i ta'ihuáamua', i ti ajta a'náj tina'aj tyihuá'xajtzi'raca'aj i Dios jimi. ¹¹ A'íimaj i ta'ihuáamua' mu jaatyáamue'tij, a'íjna jime' ti i cánya'aj je'ráaxirej i juxúure', majta a'íjna jime' i nyúucarij i maj huó'ixaa, camu majta tyí'tziinya'ca'aj tipua'aj muáacui'nyijche', sulu a'yaa mu tyitya'huóoca'an maj huáacui'nyij. ¹² Siata'aj huatóotyamua've'en mu siaj tajapuá já'sejre', siajta mua'aj mu siaj cháanacaj japua huacháatimee, siajta mu siaj a'áa ja'chej i jájtyij japua, cuí' xaa ja'mua jime', ji'nye mua'ajmaj jimi pu arí huataséjre a'íjna i tyiyáaru', ajta huápuí'ij nyú'camui', ji'nye pu'ríj jamua'reej tiquee che' á'tyeeren.

¹³ Ajta i cú'cu'uj ti'ij jáamua'reeri' ti cháanacaj japua já'ajvej, aj pu'ij jaatavén a'íjci i íiti' ti tyiyóoj ta'raa. ¹⁴ Majta hua'puácaa mu jaatá' a'íjna i íiti' i anáara'an i cué'ra'vej ti ve'éj ti'ij huatará'ra'an a'ájna jo'tij quee já'tyi'tij, a'áa mu mij tyiyá'cue'tyajca'aj a'chu huéecaj nyinyi'ra'aj japuan jé'ta' jitze. ¹⁵ Aj pu'ij i cú'cu'uj jéehua i jájtyij ejxirej i jutyényij jitze ti'ij yo'jójtye'en a'íjci i íitaj, ¹⁶ ajta i chuéj pu jaatyáhuui, ji'nye a'íi pu ootátzi'tyaca' ti'ij atyájrutyey i jájtyij i ti je'ejxirej i cú'cu'uj jutyényij jitze. ¹⁷ Aj pu jin i

cú'cu'uj jaatájaaxiejvi'ri' a'íjci i íitaj, ajta je'en jó'raa ti'ij huo'tanyó'si'tye'en a'íjma i séecan i maj yójmua'mua' pué'een i íitaj, ajta a'íimaj jimi i maj ja'astej i nyúucaria'ra' i Dios, majta Jesús jitzán ma'can tyí'xaj. ¹⁸ Ajta a'íjna i cú'cu'uj a'áa pu ja'séeria'aj ta'raa a sáata' jájtyij ti ve'éj ti ja'va'ástimee.

13

A'íimaj i maj hua'puaj i maj huápu'i'ij je'ej pua'aj huasé'rin

¹ Aj nu nyij tyi'tíj huaséj ti huápu'i'ij je'ej pua'aj huasé'rin, a'íj pu jitze i jájtyij ti ve'éj eetamá'ca'aj, arahua'puácaa pu íjmu'ujcaaj ajta arahua'puácaa ava'ahuájma'caa. Ajta i a'huáara' jitze pu cúruun tyo'carújtyi'huajma'caa síj ajta síj, ajta i mu'úura' jitze tyé'yu'si'huaca'aj i ti je'ej pua'aj namuajre' i Dios jimi. ² A'íjna i tyi'tíj ti je'ej pua'aj huasé'rin i nyaj jaaséej, a'yaa pu huasé'rihua'aj ti'ij jírpu'uj, ajta a'yaa eenye' iira'íicajma'caa ti'ij júutze'ej, ajta i tyénra'ra' ti'ij muájyej. Ajta a'íjna i cú'cu'uj, a'íi pu néijmi'i jaatátuii i ti jin jaayí'tin ti tyi'tíj je'ej huá'uurej, ajta néijmi'i i ti jin tyí'ijta ti'ij a'íjna jin antyúumua'reeriaj. ³ Ajta síj i mu'úura' a'yaa pu huasé'rihua'aj cuxáa tyí'puejtyi'huaca'aj i ti jin tin huamuí', ajta arí huarújca'aj a'íjna i ti tyí'puejtyi'huaca'aj, a'íj mu jin néijmi'i i maj a'yan huacháatimee i cháanacaj japua, je'ej mu tyo'taséj, majta je'en ja'rá'astijrej a'íjna i tyi'tíj. ⁴ Majta jaatyánajchaca' a'íjna i cú'cu'uj,

ji'nye a'íi pu néijmi'i tyaatátui a'íjci i tyi'tíj
 ti je'ej pua'aj huasé'rin ti'ij a'ín néijmi'i jin
 antyúumua'reeriaj, majta mu jaatyánajchaca'
 a'íjci i tyi'tíj, a'yan metyi'xáataj tijin:

—¿A'tanyíj a'yan een ti'ij a'mújma mu tyi'tíj,
 a'tanyíj óoca'nyej ti'ij jimi huatyényo'se'en?

⁵ Majta mu jaatá' a'íjci i ti je'ej pua'aj huasé'rin
 ti'ij je'ej pua'aj tyaataxáj i Dios, a'yaa mu
 tyaatá' ti huá'puatyej máxcirie' japuan hua'puaj
 á'tyeevi' ti'ij a'íjna jin antyúumua'reeriaj.
⁶ A'yaa pu'ij huaríj, je'ej pu pua'aj tyi'xajtaca'aj
 i Dios jimi, ajta je'ej pua'aj tyihuá'xajtaca'aj
 a'íjma i maj a'áa já'sejre' i Dios jimi, ajta
 néijmi'caa i tajapúa' maj já'sejre'. ⁷ Majta
 mu jaatá' ti'ij huo'tanyó'si'tye'en a'íjma i maj
 tyámua' tyi'tyesejre' i Dios jimi 'asta na'aj quee
 huo'tyáamue'tij, a'yaa mu majta tyaatá' ti'ij
 néijmi'caa jimi antyúumua'reeriaj i tyeítjee i
 maj a'yan séejre' i cháanacaj japua, majta i
 maj séej chuéj japua já'ma'can, majta i maj séej
 nyúucarij jin tyi'xaj. ⁸ Majta a'íjci i tyi'tíj ti je'ej
 pua'aj huasé'rin néijmi'i mu jaatyánajchaca'
 i maj a'yan huacháatimee i cháanacaj
 japua, a'íimaj i maj quee ooyú'si'huaca'
 jájcuaj imuáj ti'ij na'aj tyu'tyátaavijhuaca' i
 cháanacaj i yú'xaria'ra' jitze a'íjna i cánya'aj ti
 huatámu'vejrityi'huaca'.

⁹ Tipua'aj a'tíj iityánamuajra, che' tyámua'
 naa tyáanamuj. ¹⁰ A'íjma i maj hue'tyánasij,
 miche' hue'tyáanaj, majta i maj chúun jime'
 huá'cui'nyij, miche' majta a'yan tyityáacui'nyij.
 A'yaa mu mij tyityaataséjre'ej a'íimaj i maj

tyo'táviicue' ajta i maj jin tyá'tzaahuatye' i Dios jimi.

¹¹ Nyati'ij nyij nyajtáhua'aj séej huaséj i tyi'tíj ti je'ej pua'aj huasé'rin, ti a chóota' je'tanyéj. Hua'puácaa pu ava'ahuájma'caa ti'ij cánya'aj, ajta a'yan tyí'xajtaca'aj ti'ij i cú'cu'uj. ¹² A'íi pu ajta néijmi'i jin antyúumua'reeriaca'aj ti'ij a'íjna i ti anaquéej huataséjre i ti ajta je'ej pua'aj huasé'rin, a'yaa pu'ij tyihuá'ijtya'ca'aj maj néijmi'i i maj a'yan séejre' i cháanacaj japua jaatyáanajche a'íjci i ta'nájcaj i ti huarúj i ti tyí'puejtyi'huaca'aj i ti jin tin huamuí'. ¹³ A'yaa pu jéehua tyi'tíj tyí'uuriajca'aj i maj tyámua' tyo'taséj. Ajta pu jaayí'tihua'aj ti tiéj uje'cárieenyij u jútye' meeséeracaj i tyeítyee. ¹⁴ A'íj pu'ij jin huo'cuanamuaj i tyeítyee i maj a'yan séejre' i cháanacaj japua, ajta a'yan rijcaa a'íjci jimi i ti anaquéej huataséjre i ti je'ej pua'aj huasé'rin, ajta je'en huo'ta'íj mej mij jaatyátaahuaj tyi'tíj tyévira' ti a'yan huasé'rin ti'ij a'íjna i ti anaquéej huataséjre i ti tyí'puejtyi'huaca'aj a'íjna jime' i chúun ajta je'en óoche' júurica'aj. ¹⁵ Majta a'íjci i ti je'tyáa'sej i ti je'ej pua'aj huasé'rin a'yaa mu tyaatá' ti'ij jaatá'an ti tyu'taxáj a'íjna i maj jaatyátaahuaca' ajta je'en huó'cui'nyij a'íjma i maj quee jaatyáanajche. ¹⁶ Ajta néijmi'caa i maj ciléenye', majta i maj viváajma'aj jin tyityatatyíj, i chíjtyaanyi'ij, i maj quee je'ej tyéejviicue', i maj juxáahuaj jó'juhua'an majta i maj ca'nyéjrij jin tyí'muarie', a'yaa pu tyu'ta'íjtaca' mej mij hua'náyu'xaxi'in i hua' muáca' jitze, nusu maj

hua'ajtyiyú'xaxi'in i huá'cuaatze'. ¹⁷ Ajta quee i'riitaca'aj ti tyi'táj huánanan nusu ti a'táj tyi'táj huátoonyij, tipua'aj quee anáyu'si'huaj i ju-muáca' jítze, nusu quee ajtyiyú'si'huaj i ju-cuáatze' je'ej ti ántyapuaj a'íjna i tyi'táj. ¹⁸ A'íj pu jin a'yan tyúuxie've' maj jéehua tyu'yí'tihua'an, a'íjna i ti tyojó'itej, che' yo'itéej já'ra'nyij je'ej ti huatóomua'aj a'íjna i ti jin tyí'itej ajta je'ej ti ántyapuaj a'íjna i tyi'táj, ajta i ti jin tyí'itej, a'áa pu jo've'mej a'íimaj tzajta' i tyétyacaa, a'yaa pu'ij aráasej anxityej japuan huééicatyej japuan aráasej ti tyí'itej.

14

A'íjna i cánya'aj majta a'íimaj i ti hua'antyíhuoj

¹ Nyati'íj nyij jaaséj a'íjci i cánya'aj, ti a'áa jo'tyávaaca'aj i jiríj japua ti a'yan tyaja'rájtyapuaj tijin Sión. Majta jamuán a'áan jo'tyú'uuca'aj i maj anxityej japuan huá'puatyej japuan muáacuj ví'ra'aj ará'asej i tyeítýee, a'yaa pu tyé'yu'si'huaca'aj i huá'cuaatze' jítze je'ej ti ántyapuaj a'íjna i cánya'aj, ajta je'ej ti ántyapuaj a'íjna i vástaria'ra'. ² Nyajta je'en tyi'táj huánamuajri' ti u tajapúa je'cánamuajria'ca'aj, a'yaa pu namuajria'ca'aj ti'íj jájtyij ti ca'nyíin tyájujhua'naj, ajta a'yájna mati'íj i víityee maj tyényuuca'an, ajta i nyúucarij i ti jin tyu'taxájtaca', a'yaa pu namuajria'ca'aj mati'íj i maj tyí'cuiinaj a'íjna jítze i áarpaj. ³ Majta a'íjna chuiicaca'aj i chuícarij ti jájcuj a'íjna jimi i Dios, majta

a'íimaj jimi i maj muáacuaj i maj júurij, majta hua' jimi i huásij. Capu a'tíj jaayí'tihua'aj ti jáari'rej a'íjna i chuícarij, sulu a'íi mu'uj i maj anxityej japuan huá'puatyej japuan muáacuaj ví'ra'aj ará'asej, i ti ajta huó'huii íiyan cháanacaj japua. ⁴ A'íi mu a'íin pué'een i maj tyámua' een, i maj quee huóoxana'cirej úucaá jamuán, i maj majta jamuán jó'juhua'an i cánya'aj jo'tíj na'aj ti jooméj. A'íijma pu huáhuui hua' tzajta' i maj a'yan séejre' i cháanacaj japua mej mij huatátuiri'huaj i Dios jimi majta i cánya'aj jimi. ⁵ Camu a'náj tyi'tíj jin tyu'hué'taca', ji'nye ji're'nye'ej mu séejre' i Dios jimi.

Je'ej maj tyu'taxájtaca' i maj huéicaj i maj tajapuá tyí'huüre'

⁶ Nyajtáhua'aj nu séej huaséj i ti tajapuá tyí'huüre', jútye' pu já'ra'ra'ca'aj ti'ij nyúucarij huo'té'exaatye'en néijmi'caa i maj a'yan huacháatimee i cháanacaj japua, i maj séej chuéj japua já'ma'can, i maj seequéj tyu'xáxa'aj, majta i maj séej chájta'naj jitze ja'chej. ⁷ A'yaa pu ca'nyiin jin tyí'xajtaca'aj tijin:

—Siata'aj já'tyese' i Dios, siajta tyaatatyójtzi're'en, ji'nye pu'ríj tya'rá'aj a'náj ti huá'xijtye'en i tyeítyee. Siata'aj jaatyáanajche a'íjna i ti jaatyátaahuaca' i tajapuá, ajta i cháanacaj, ajta i jájtyij ti ve'éj, ajta i ti huajéexavi'ijmee.

⁸ Ajtáhua'aj pu síj i ti tajapuá tyí'huüre' cújta' tyu'xájtasime'ej, a'yan tijin:

—Pu'ríj á'vej, pu'ríj á'vej a'íjna i Babilonia, a'íjna i ti huo'tyátimue'raj a'íjna jime' i ti hua'

jamuán huóoxana'cirej i maj a'yan séejre' i cháanacaj japua.

⁹ Aj pu'ij ajtáhua'aj síij ti tajapuá tyí'huüre' cújta' tyu'xájtasime'ej ca'nyíin jime' a'yan tijin:

—Típua'aj a'táj janajchej a'íjci i tyi'táj ti je'ej pua'aj huasé'rin, nusu huatóoa'an maj jo'siimua' i cuáatza'ra'an jitze nusu muáca'ra'an jitze je'ej ti ántyapuj a'íjna i tyi'táj ti je'ej pua'aj huasé'rin,

¹⁰ Dios pu jaatyátimue'raste'sij a'íjna jime' i ti huápu'ij nyú'camui', a'íjna i ti arí tyámua' jáaruuj ti a'yan een ti'ij huá've'rij ti tyu'jé'caj, a'íi pu'ij jajpuéetzij ta'mej i tiéj jime', ajta a'íjna jime' i ti a'yan curiá'rie' ti'ij tyapúusti', a'yaa pu'ij tya'ajpuéetzij ta'mej hua' jimi i maj tajapuá tyí'huüre', ajta a'íjna jimi i cánya'aj. ¹¹ Ajta ájcitzuj a'íjna jime' i maj jin jajpuéjtzij jusén jime', ajta quee hua'tá'caa maj huóoso'pe'en tújca nusu tíca', sulu a'yaa mu tya'ajpuéetzij muá'ju'un a'íimaj i maj jana'michej i tyi'táj ajta i tyévira' majta i maj hua'ajtyiyú'xaxij je'ej ti ántyapuj a'íjna i tyi'táj. ¹² A'yaa pu'ij huataséjre'ej i maj jin tyé'viicue' a'íimaj i maj tyámua' een, i maj a'yan ricij je'ej ti tyí'ijta i nyúucarij, majta ja'tzaahuatye' a'íjci i Jesús.

¹³ Aj nu nyij a'táj huánamuajri' ti jútye' a'tyajá'xajtaca', a'yaa pu tyinaaté'exaaj tijin:

—Miche' huatóotyamua've'en a'íimaj i maj ja'tzaahuatye' i tavástara'. Ajta i júuricama'ra' i Dios a'yaa pu tyí'xaj tijin: “A'yaa pu tyi'ja'yájna, a'íi mu juso'pe'en, mej mij quee che' tyi'táj jin á'viicue'ria'aj, ji'nye a'íimaj mu tyámua' tyu'muáriej.”

I chuéj japua ti tyú'ciiriaca'

¹⁴ Nyati'ij nyij a' únyeeriaca', aj nu nyij jéetirij huaséj ti cuéeinara', ajta a'tíj japuan újcatyii ti a'yan huasé'rihua'aj ti'ij tyáati'. A'íi pu cúruun ucárujtya'ca'aj ti ooroj jin taavijhua, ajta júxuj iityéchooca'aj. ¹⁵ Aj pu'ij síj ti tajapuá tyí'huüre' a'úun je'rájraa u tyeyúuj tzajta', a'yaa pu'ij ca'nyiin jin tyaatajé a'íjci i ti jéetirij japua anjo'ojca'tyii tijn:

—Pata'aj mu júxuj jin jaaré'vejche i ti arí tyí'ciirij, pajta tyu'riá'tzaanaj, ji'nye pu'ríj tya'rá'aj a'náj paj jitzán tyu'riá'tzaanye'ej pu'ríj huariá'ca'naca' i cháanacaj japua.

¹⁶ Ajta a'íjna i ti jéetirij japua áan jo'ojcatyii, a'íi pu'ij tyu'riá'tzaj i ti tyú'ciiriaca' i cháanacaj japua.

¹⁷ Aj pu'ij ajtáhua'aj síj ti tajapuá tyí'huüre' iirájraa u tyeyúuj tzajta', a'íi pu ajta júxuj iityéchooca'aj. ¹⁸ Ajta jo'tij jo'tyéjvee a'íjna i maj japuan tyí'mu'vejritacaa, a'áa pu síj ti tajapuá tyí'huüre' je'rájraa, a'íi pu a'íjna jin antyúumua'reej i tiéj, aj pu'ij a'yan tyaatajé a'íjci i ti júxuj iityéchooca'aj tijn:

—Pata'aj jaaré'vejche, pajta jájsiire'en i táque'ra' i ciyéj ti a'áa jo'váatimee i cháanacaj japua, ji'nye pu'ríj cuasij a'íjna i táque'ra'.

¹⁹ Aj pu'ij i ti tajapuá tyí'huüre' jaaré'vejchaca', ti'quij jájsii i ti tyú'ciiriaca' i cháanacaj japua, aj pu'ij ju'cáahua'xij a'íjna tzajta' i maj jin jajache' i úuvaj, i ti a'ín pu'éen i ti jin Dios huápu'i'ij nyú'camui'. ²⁰ A'áa mu mij yo'jáchej apua'quéj i chájta'naj jitze, aj pu'ij

xúure'ej eerámui'yaca', a'yaa pu'ij ootí'ij ja'raa ti'ij jo'tij ja'tá'asej i xáachime'ra'an i cahuáayu', ajta a'yan japua huatámui'yaca' a'chu huéeicaj anxityej quilometro.

15

A'íimaj i maj tajapuá tyí'huiire' ajta i puéjtzij ti aráhua'puaj ará'asej

¹ Nyajtáhua'aj nu tyi'táj va'cán huaséj u tajapuá, arahua'puáca nu huaséj i maj tajapuá tyí'huiire', a'ij mu jin antyúumua'reej maj arahua'puáca jin puéjtzij huo'tá'an i ti jin néijmi'i tye'entyipúa'rij i Dios ti jime' nyú'camui'.

² A'yaa nu nyajta tyi'táj tyu'séj ti naa tyí'me'estij, a'áa pu jo'muáanyijmee ti'ij jájtya'huaa i tiéj tzajta', a'áa mu jo'tyú'uuca'aj áarpaj metyi'tyai'ij a'íimaj i maj jaatyáamue'tij a'íjci i ti je'ej pua'aj huasé'rin, majta i tyéviij ti jahuiire', majta i ti jin tyí'itej i ti jin antyapuj.

³ Majta a'íjna chuiicaca'aj je'ej ti huaríj i Moisés i ti tyí'huiiria'ca'aj i Dios jimi, majta a'íjna jime' je'ej ti huaríj i cánya'aj. A'yaa mu tijin:

Huápuí'ij pu tyámua' naa huasé'rin je'ej paj tyí'táj jin huaríj,

tavástara', Dios mu paj néijmi'i jin antyía'mua'reej,

tyámua' pu een ajta tzáahuatyí'ra'aj séejre' je'ej paj tyí'ijta,

muáaj paj jusén jime' tyí'ijta.

⁴ ¿A'tanyíj quee muatzihnye' muéetzij tavástara' paj pué'een?

¿A'tanyíj quee tyimuaatatyójtzi're'ej?
 Ji'nye muáaj paj ji'réenya'aj séejre',
 néijmi'i mu i tyeítyee mujo'vá'ju'uj muá'ju'un
 mej mij muatyáanajche,
 ji'nye pu'ríj huataséjre i paj jin tyí'ijta.

⁵ Nyati'ij nyij atányeeriaca', aj nu nyij jaaséj ti antácuunyica'aj i tyeyúuj tajapuá ti já'sejre'. ⁶ A'úu mu mij tyeyúuj tzajta' je'rácij i maj tajapuá tyí'huiire' i maj aráahua'puaj ará'asej, majta jaa'á'sima'aj i puéjtzij i ti aráahua'puaj ará'asej. Cáanarij mu tyí'cheen ti naa tyi'tyataatiyi'ij, majta ahuoji'que'ejma'caa jutavij jitze puáasij jime' ooroj ti jin taavi-jhua. ⁷ Ajta síj i maj muáacuaj i maj júurij, a'íi pu'ij túxa'aj tyihuo'rái'pu'tyej a'íjma i maj aráahua'puaj ará'asej i ti jitzán ava'ajistíjmees i ti jin huápu'i'ij nyú'camui' i Dios i ti jusén jime' júurij. ⁸ Aj pu'ij tyámua' tyá'ajcitzujtariaca' u tyeyúuj tzajta' a'íjna jime' i muárie'ria'ra' i Dios, ti'quij tyámua' tyo'huájistyaca' u tyeyúuj tzajta' a'íjna i citzíj, capu che' huatái'riitariaca' ti a'tíj utyájrutyej 'asta na'aj quee antyipua'rej je'ej maj tyi'tíj jin puéjtzij tyihuo'tá'sij a'íimaj i maj aráahua'puaj ará'asej.

16

I túxa'aj ti a'íjna jin avá'jistij i ti jin Dios nyú'camui'

¹ Nyati'ij nyij nyúucarij huánamuajri' ti u tyeyúuj tzajta' ca'nyíin jin a'yan tyihuo'té'exaaj a'íjma i maj tajapuá tyí'huiire' i maj aráahua'puaj ará'asej a'yan tíjin:

—Séricuj, siata'aj ayo'cáxire'en i cháanacaj japua i ti avá'jistij i túxa'aj jitze i ti aráahua'puaj tya'rá'asej, i ti jin i Dios huápu'i'ij nyú'camui'.

² Aj pu'ij sáij ujo've'mej, ti'quij uye'cáaxirej i cháanacaj japua i túxa'aj jitze ti arámuaaca'aj, aj pu'ij a'íjma jimi i tyeítyee i ti hua' jitze á'yu'si'huaca'aj je'ej ti ántyapuaj a'íjna i tyi'tíj ti je'ej pua'aj huasé'rin, a'íjma jimi pu atzáj huataséjre i ti je'ej pua'aj curiá'rie', ajta je'ej pua'aj huasé'rin.

³ Ajtáhua'aj i sáij i tajapuá ti tyí'huíire', a'íi pu ajta uye'cáaxirej i túxa'aj ti jitze arámuaaca'aj, a'áa pu ya'ráaxirej i jájtyij japua ti ve'éj, aj pu'ij i jájtyij a'yan huataséjre ti'ij xúure'ej ti eerámui'yaca' i tyévi'j jitze ti huame'rej, aj mu mij néijmi'i huácuij i maj jájtyij jitze já'chajca'aj.

⁴ Ajtáhua'aj i sáij ti tajapuá tyí'huíire', a'íi pu ajta uye'cáaxirej a'íjna i ti túxa'aj jitze arámuaaca'aj i játya'naj japua, ajta jo'tíj ja'ajéexavi'ijmee, aj pu'ij a'yan huaríj ti'ij i xúure'ej. ⁵ Nyajta a'yan tyáanamujari' a'íjci i tajapuá ti tyí'huíire' i ti a'íjna jin antyúumua'reej i jájtyij, ti a'yan tyu'taxájtaca' tijin:

—Muáaj paj tyámua' een, a'íj paj jin antyá'mua'reej pej pij huo'xíjtye'en, muáaj paj jájcua'j imuáj séjria'ca'aj, pajta ijíj pooj séejre', ⁶ ji'nye a'íimaj mu i tyétyacaa huo'cuij i maj muéetzij jimi tyámua' tyí'tyesejre', majta i maj muéetzij jitze ma'can tyí'xajtaca'aj, ajta ijíj paj muáaj huo'ta' mej mij xúure'ej huaye'en. Jujíimua'aj mu a'yan tye'entyimué'tíj.

⁷ A'yaa nu nyajta tyáanamujri' ti a'tíj utyojo'taxájtaca' jo'tij jo'tyéjvee i maj japuan tyí'mu'vejritacaa, a'yan tijin:

—A'yaa pu tyi'ja'yájna tavástara' mu paj Dios pué'een, mu paj néijmi'i jin antyía'mua'reej, tzáahuatyira'aj paj jin huo'xíjtyej, pajta quee tyi'tíj jin ootyá'itzee.

⁸ Ajtáhua'aj síj i ti tajapuá tyí'huiire', a'íi pu ajta uye'cáaxirej i ti arámuaaca'aj i túxa'aj jitze, a'íj pu japua jaráaxirej i xicáj, ajta a'yan tyaatá'ti'ij i xicáj huo'tyátieeraaj i tyeítyee. ⁹ Aj mu mij huápu'i'ij huatyájttaa i tyeítyee, majta camu jaatáxaahuataca' i maj jin je'ej pua'aj ricij, camu majta tyaatatyójtzi'rej i Dios, sulu je'ej mu pua'aj tyaatajé i Dios, i ti a'íjna jin antyúumua'reej ti puéjtzij huo'tá'an.

¹⁰ Ajtáhua'aj i síj i ti tajapuá tyí'huiire', a'íi pu ajta uye'cáaxirej a'íjna ti jitze aráamuaca'aj i túxa'aj, a'íj pu japua jaráaxirej jo'tij ja'cájca a'íjna i tyi'tíj ti je'ej pua'aj een, aj pu'ij huápu'i'ij huatyática'riaca' jo'tij tyejé'ijtaj. Majta i tyeítyee, a'íi mu uhuóche've'ej i junyanúu jitze a'íjna jime' maj jéehua huápu'i'ij jajpuéjtzica'aj, ¹¹ Camu majta jaatáxaahuataca' i maj je'ej pua'aj ricij, sulu je'ej mu pua'aj tyaatajé i Dios i ti tajapuá já'sejre', a'íjna jime' i maj jéehua jajpuéjtzica'aj.

¹² Ajtáhua'aj síj i ti tajapuá tyí'huiire', a'íi pu ajta uye'cáaxirej i túxa'aj ti jitze arámuaaca'aj, a'áa pu ya'ráaxirej i játya'naj jitze ti ve'éj ti a'yan antyapuaaj tijin Éufrates, aj pu'ij atyáaxi' i játya'naj, mej mij antácinnyeaj a'íimaj i maj tyi'ijta

i maj a'áa pujmua' jo'vá'ju' jo'tij jé'ejnyinyiij i xicáj.

¹³ Nyati'ij nyij huo'séj maj huéicaj ejnyéxij hua' tyenyij jitze a'íjna i cú'cu'uj, ajta a'íjna i tyi'táj ti je'ej pua'aj huasé'rin, ajta a'íjna i ti hue'tzij jin tyí'xaj, a'yaa mu huasé'rihua'aj mati'ij taachuísee. ¹⁴ A'íi pu júuricamej pué'eenye'ej i maj tyiyáaru' jitze ajtyáma'can, a'íi mu ciinyaca'aj néijmi'que' i cháanacaj japua, mej mij huá'ajsire'en a'íimaj i maj tyí'ijta, mej mij huatyéno'se'en a'ájna xicáara' ti'ij jitzán huataséjre'ej i Dios ti néijmi'i jin an-tyúumua'reej.

¹⁵ A'yaa pu tijin: “Cási', nyáaj nu uvé'nyesij ti'ij náhua'rij. Che' huatóotyamua've'en a'íjna i ti atányeej, ajta tyí'chajca ti'ij quee muá'vi'ij jo'cha'canye'en, mej mij quee i tyeítyee jaaséj i ti jutyevi'ra.” ¹⁶ Majta je'en hua'ajsih néijmi'caa i maj tyí'ijta a'ájna a ti a'yan tyaja'rájtyapua huá'nyuucaa jime' i hebreos tijin Armagedón.

¹⁷ Ajtáhua'aj síj ti tajapúa tyí'huire', a'íi pu ajta uye'cáaxirej i ti arámuaaca'aj i túxa'aj jitze, aj pu'ij síj ca'nyíin jin tyu'taxájtaca' ti uje'rávaaca'aj u tyeyúuj tzajta' a'ájna jo'tij jo'tyéjvee i maj japon tyí'mu'vejritacaa, a'yaa pu tyu'taxájtaca' tijin:

—Pu'rij néijmi'i tye'entyipua'riaca'.

¹⁸ Aj mu mij huatyána'axcava'xij majta tyényuucacaj, ajta jéehua tyi'tyáhuaasime'ej, i cháanacaj pu ajta ca'nyíin jin huatóoca'tzij, a'yájna ti'ij quee a'náj tyu'tóoca'tzij mati'ij mana'aj a'yan tyí'tyesejre' i tyeítyee. ¹⁹ Ajta

a'íjna i chájta'naj ti ve'éj, huéicaque' pu ootátzi'tyaca', ajta á'vatziyxí i chájta'naj i séej chu'éj japua ti já'ma'can, ajta i Dios pu jo'támua'reeri' a'íjna i chájta'naj ti ve'éj ti a'yan tyaja'rájtyapua j tijn Babilonia, ti'ij puéjtzi j jaatá'an ajta je'en jáaci'tyij i ti jin huápuí'ij nyú'camui' i Dios. ²⁰ Ajta néijmi'i jo'tij ja'ráahuachij i jájtyij jitze, ajta jiríj ti huaquéetimee a'íi pu néijmi'i tyaja'huópua'rixij, ²¹ majta tyéetyee tajapua je'cáavatzij maj tyatí'ti'ijmee a'íjma japua i tyeítyee, huá'puatyej quilluj mu tyijetyéjma'caa i tyéetyee, majta a'íimaj i tyétyacaa, je'ej mu pua'aj tyaatajé i Dios a'íjna jime' i tyéetyee maj cáavatzij, ji'nye jéehua mu jajpuéjtzica'aj.

17

Dios pu jo'xíjtyej a'íjci i íitaj ti huóotoj

¹ Aj pu'ij síj ti tajapua tyí'huiire', ti ajta séej iityei'ca'aj i túxa'aj ti aráahua'puaj tya'rá'asej, a'íi pu mu jo've'mej, ti'quij a'yan tyinaaté'exaaj tijn:

—Mupo've'me', nyamuaataséejratye'sij je'ej ti tya'ajpuéetzij ta'mej a'íjna i íiti' ti jamue'tica'aj i túmii i jutyévij jime', a'íi pu a'ín pu'éen i ti a'áan jo'ojcaj i jájtyij japua ti ve'éj. ² Majta a'íimaj i maj tyí'ijta i cháanacaj japua, a'íi mu huóoxana'cirej a'íjna jamuán i íitaj, majta a'íimaj i maj a'yan huacháatimee i cháanacaj japua, a'íimaj mu huatyáata'ruj a'íjna jime' ti i íiti' huo'ta' mej mij jamuán huóoxana'cire'en.

³ Ajta je'en i júuricama'ra' i Dios ti naataséjraj, a'í pu i ti tajapuá tyí'huiire' nyojo'vi'tij a'ájna jo'tij quee já'tyi'tij. A'áa nu nyij ítaj huaséj ti i cú'cu'uj ti po'vij japua avá'catyii, ajta jéehua jitzán á'yu'si'huaca'aj i ti jin je'ej pua'aj tyá'xaj i Dios, arahua'puácaa pu íjmu'uj a'íjna i cú'cu'uj ajta tamuáamuata' pua'mácan ava'ahuájma'caa. ⁴ Ajta a'íjna i íiti' nacámuaa pu tyi'tyéchajcaa, ajta cí tyí'po'vij, jéehua pu tyo'carújtya'ajma'caa a'íjna i ti ooroj jin tyí'taavijhua, ajta tyetyéj ti huápu'ij tyá'najchij, ajta peerla tyi'tíj. A'í pu ajta túxa'aj iityei'ca'aj ti ooroj jin taavijhua, a'í pu jitze avá'ajística'aj i ti xána'visi' huasé'rin, ajta i ti jin huóoxana'cirej a'íjna i íiti', ⁵ ajta cuáatze' a'yan tyé'yu'si'huaca'aj i nyúucarij nyaj quee yo'itéej na'raa, a'yaa tyé'yu'si'huaca'aj tíjin: “Babilonia, i ti va'cán jin tyi'tyéjvee, ajta hua' náanaj a'íimaj i úucaa i maj jamue'tij i túmii i jutyévi'j jime', ajta néijmi'i i ti je'ej pua'aj tyí'een íiyan cháanacaj japua.” ⁶ Aj nu nyij jaaséj ti i íiti' tahuáaca'aj a'íjna jime' i hua' xuure' i maj tyámua' tyí'tyesejre' i Dios jimi, majta a'íimaj i maj huácuij a'íjna jime' maj Jesús jitze ma'can tyí'xajta'aj. Aj nu nyij je'ej tyo'taséj nyati'ij jaaséj. ⁷ Ajta i tajapuá ti tyí'huiire', a'yaa pu tyinaaté'exaaj tíjin:

—¿Ji'nye een jime' je'ej petyo'taséj? Nyáaj nu muaaté'exaatye'sij je'ej ti huatóomua'aj a'íjna i nyúucarij ti á'yu'si'ij i íiti' jitze, nyajta je'ej ti huatóomua'aj i ti japan avá'caj, a'íjna i ti arahua'puácaa íjmu'uj, ajta tamuáamuata'

pua'mácan ti ava'ahuájmee. ⁸ A'íjna i tyi'tíj i paj jaaséej, a'íi pu anaquéej séjria'ca'aj, ajta ijíj capu che' séejre', ajta óoche' pu eetaméj a'ájna jo'tij ja'tyácun ti'ij quee eexúj á'pua'rej. Majta a'íimaj i maj a'yan huacháatimee i cháanacaj japua, i maj quee á'yu'si'ij je'ej maj ántya'ruj a'íjna jitze i yu'xarij i maj jin júurij muá'ju'un, ti'ij na'aj tyu'tyátaavijhuaca' i cháanacaj, a'íimaj mu je'ej tyo'taséjraj mati'ij jaaséej a'íjna i tyi'tíj ti je'ej pua'aj huasé'rin, i ti aamí' séjria'ca'aj, ajta je'en quee che' aja'hua'taca'aj, ajta óoche' pu huataséjre'sij.

⁹ 'A'yaa pu amitéeria'aj ja'mej a'tíj ti ty-ojó'itej ti ajta tyámua' metyóomua'rej. A'íjna i ti arahua'puácaa íjmu'uj, a'yaa pu hu-atóomua'aj a'íjna i jiríj ti aráahua'puaj ará'asej ti japuan áan jo'ojcaj i íiti', a'yaa pu ajta huatóomua'aj maj aráahua'puaj ará'asej i maj tyi'ijta. ¹⁰ Mua'anxíviij i maj meríj huáacuii, síj pu ooj tyi'tíj jin tyi'tyéjvee, ajta i síj capu eexúj séejre'. Ajta ti'ij huataséjre'en capu jéehua á'tyeeren. ¹¹ Ajta i tyi'tíj ti je'ej pua'aj huasé'rin ti jájcuaj imuáj séjria'ca'aj, ajta quee che' séejre', a'íi pu a'íin pu'éen i ti aráhueeicaj, a'íi pu ajta hua' jitze ajtyáma'can i maj aráahua'puaj ará'asej, a'íi pu ajta néijmi'i á'pua'ren.

¹² 'Ajta a'íjna i ti tamuáamuata' pua'mácan ava'ahuájmee, a'íi mu a'íin pu'éen i maj tamuáamuata' ará'asej i maj tyi'ijta, i maj quee xu tye'entyájrurij mej mij tyu'ta'íjtaj, majta móoche' mu ja'ancuriáa'sij mej mij séej ooraj á'tyeevi'in maj tyu'ta'íjtaj a'íjna jamuán i tyi'tíj

tì je'ej pua'aj huasé'rin. ¹³ A'íimaj i maj tamuáamuata' ará'asej i maj tyí'ijta, néijmi'i mu juxa'aj mana'aj tyí'xaj, a'íj mu jin jaatátuiire'sij i maj jin antyúumua'reej a'íjci i tyi'tíj tí je'ej pua'aj huasé'rin. ¹⁴ A'íi mu mij jaatanyo'si'tye'ej a'íjci i cánya'aj, ajta a'íi pu i cánya'aj huo'tyámue'tij, majta a'íimaj jamuán séejre' i Dios tí huo'tajé ajta je'en hua'antyíhuoj mej mij tyámua' eenye', jì'nye i tavástara' pu tyihua'íjtye' a'íimaj i maj hua' vástara' pué'een i tyeítyee, ajta a'íin pué'een i tajtúhuan tí néijmi'caa tyí'ijtye' i séecan i tajtúhuaanyij.

¹⁵ A'yaa pu ajta tyinaaté'exaa j i tajapuá tí tyí'huiire' tíjin:

—A'íjna i jáytyij tí ve'éj i paj jaaséej, i tí japuan anjo'ojca'tyii i íiti' tí jaamué'tij i túmii i jutyévira' jime', a'íi mu a'íin pué'een i tyeítyee i maj séej chuéj japua já'ma'can, i maj séej nyúucarij jin tyí'xaj, majta séej chájta'naj jitze ja'chej. ¹⁶ Ajta a'íjna i a'huáara' tamuáamuata' tí ará'asej i paj jaaséj, ajta a'íjna i tí je'ej pua'aj huasé'rin, a'íi mu jájcha'íiria'aj muá'ju'un a'íjci i íitaj tí jaamué'tij i túmii i jutyévira' jime', a'íi mu ayooriésij metya'cá'ri'ran i tí tyi'tyéechan, majta je'en jaatyáci'mij i tyévira' mati'ij mij jaatyáteeraj. ¹⁷ Dios pu arí a'yan tyihuo'cámua'riityej hua' xiéjnyu'caa tzajta' mej mij a'yan huárinij je'ej tí a'íin tyá'xie've', a'íj mu jime' juxa'aj mana'aj rinyij mej mij jaatátuiire'en a'íjci i tyi'tíj tí je'ej pua'aj huasé'rin i maj jin antyúumua'reej, 'asta na'aj quee a'yan atyojo'ré'nyej je'ej tí i Dios arí tyu'taxájtaca'. ¹⁸ Ajta a'íjna i íitaj i paj jaaséej,

a'íi pu a'íin pu'éen i chájta'naj ti ve'éj i ti tyihuá'ijtye' néijmi'que' i cháanacaj japua.

18

A'íjna i Babilonia ti jó'vej

¹ Nyati'ij nyij nyajtáhua'aj séej huaséj i ti tajapúa tyí'huiire' ti jútye' aje'cáma'ca'aj, va'cán pu jin antyúumua'reej, néijmi'que' pu i cháanacaj japua huanyéeri'cij ja'raa a'íjci jime' i ti á'taaca'aj i jujitzé. ² A'yaa pu ca'nyiin jin tyí'jijhuaca'aj tijin:

—Pu'ríj á'vej, pu'ríj á'vej a'íjna i Babilonia i chájta'naj ti ve'éj. Pu'ríj hua' chi'ij pu'éen a'íimaj i tyiyáaru', jo'maj ja'chej i júuricamej i maj xána'visi' huasé'rin, ajta jo'maj já'asacaa i pína'see i maj xána'visi' huasé'rin, majta tyi'tyán i tyaj quee hua'xie've'. ³ Ji'nye néijmi'i mu i maj séej chuéj japua já'ma'can huatyáata'ruj mej mij je'ej pua'aj huárinyij ti'ij a'íjna i Babilonia, a'íimaj i maj íyan tyí'ijta i cháanacaj japua, néijmi'i mu jamuán huóoxana'cirej, majta i maj tyí'to'racia íyan cháanacaj japua, a'íi mu huoochíjtyaanyi'taca' a'íjna jime' ti a'íin a'yan tyihuo'tá' je'ej maj tyi'tíj tyí'xie'va'ca'aj.

⁴ Nyati'ij nyij nyajtáhua'aj séej nyúucarij huánamuajri' ti jútye' tyajá'xajtaca'aj a'yan tijin:

—Siata'aj eeráciinyej i chájta'naj jitze, mua'aj mu siaj nyetyeíityeristyamua' pu'éen, siaj sij quee hua' jamuán huóoxana'cire'en, ti'ij quee ajta jamuáaci'tyij i puéjtzij, ⁵ ji'nye a'íi pu arí huápu'ij ootyá'ítzee i Dios jimi, a'íi pu i Dios jamua'reej i ti jin je'ej pua'aj tyi'tyúucha'ij a'íjna

í íiti'. ⁶ Che' a'yan ajta tyáaci'tyij ti'ij ajta a'íin puéjtzij tyihuo'tá' i ti huo'mué'táj, che' hua'puaj tyu'nájchitaj i ti jin je'ej pua'aj huaríj, siajta i váasuj ti jitzán jaya'caa siata'aj ja'vá'jsten a'íjna jime' i ti hua'puaj ará'asej i ti jin huatyátahuan, a'yájna ti'ij a'íin séecan tyu'tá', ⁷ siata'aj puéjtzij jaatá'an ti'ij huatóoxaamujritye'en, a'yájna ti'ij jusíj tya'huóotzaahuaj, ajta je'ej ti tyu'tóosejrataca'. Ji'nye a'yaa pu tyí'xaj i jutzájta' tijin: "A'yaa nu tyi'tyéjvee ti'ij íiti' ti tyí'ijta. Canu antyínyasiijtariaca', canu nyajta jajpuéetzij na'mej." ⁸ A'íj pu jin séej xicáj japuan rávesij i ti jin jajpuéetzij ja'mej, aj pu'ij tyi'ijcuí'nyij, ajta huatóoxaamujritye'ej, ajta huataí'cuataj, aj pu'ij huatyáteeri'huaj, ji'nye i Dios néijmi'i pu putyí'uurej, a'íj pu i tavástara' a'yan puéjtzij tyaata'sij.

⁹ A'íimaj i maj tyí'ijta i cháanacaj japua, i maj jamuán huóoxana'cirej, majta jamuán huochíjtyanyi'taca', a'íj mu juyiinyen majta huatóoxaamujritye'sij mati'ij jaaséj ti ájcituzj a'íjna jime' ti tyátaasij. ¹⁰ Majta a'imuáj jo'tya'úuj muá'ju'un a'íjna jime' maj jatziinye' i ti jin jajpuéetzij, a'yaa mu tyu'taxájtaj tijin:

—¡Cuí' xaa! ¡Cuí' xaa muáaj mu paj chájta'naj pué'een ti ve'éj, Babilonia mu paj va'cán jin antyía'mua'reej! Ji'nye jiye'tzín tya'rá'aj i paj jin períj jajpuéetzij.

¹¹ Majta i maj tyí'to'racia íyan cháanacaj japua, a'íj mu majta juyiinyen majta huatóoxaamujritye'ej a'íjna jime' i chájta'naj, ji'nye capu che' ma' a'táj ta'mej ti tyihuo'nanieej

i maj tyú'tisij, ¹² tipua'aj ooroj, pláataj, i tyetyéj ti tyámua' tyá'najchij, tyi'táj peerla, cáanarij ti tyi'jí're'en i ti tyí'me'estij, na'ríij ti táxie'muaa, nusu i ti po'vij, ajta néijmi'i i ciyéj ti jéehua tyá'najchij, na'ríij tyi'táj coobre, nusu tyapúusti', nusu i tyetyéj i maj tyi'cámejtyee, ¹³ nusu i cue'ráj maj tyi'na'chityaa i ti naa tyaarie'ej, nusu i ñjcuca na'ríij tyi'táj miirra, nahuáj, aséityij, aríinaj ti jí're'en, tyeríicuj, ajta ya'muáatyee i maj hua' japuan tyí'ti'ijcicaa, nusu cánya'xií, cahuáayu'uj, i caríaata', majta a'ñmaj i maj ca'nyéjrij jin tyí'muarie' juxa'aj tyeítýee jimi. ¹⁴ A'yaa mu tyaatájeevij a'ñci i chájta'naj tijin:

—¡Capu che' séeria'aj ta'mej muéetzij jimi a'ñna i táque'ej ti jéehua mua'ránajchica'aj, papu'ríj jusén jin tyojo'riej i ti huápu'íj tyá'najchij i paj jin chíjtyaanyi'taca'aj!

¹⁵ Majta a'ñmaj i maj a'yan éenye'ej tyí'tooca'aj majta a'ñna jin huoochíjtyaanyi'taca', a'ñ mu a'imuáj jo'tya'úuj muá'ju'un, a'ñna jime' maj jatziinye' i ti jin jajpuéjtzij, muyíinyaj majta juxaamúuiritya'aj, ¹⁶ a'yaa mu tyi'xáataj muá'ju'un tijin:

—¡Cuí' xaa! ¡Cuí' xaa i chájta'naj ti ve'éj! I ti a'ñna tyi'tyéechan i ti me'estíj ti naa een, ajta a'ñna jime' i ti táxie'muaa, ajta i ti po'vij jime', ajta a'ñna tyo'carújtye'ejmee i ti ooroj jin tyi'taavijhua, ajta i tyetyéj ti huápu'íj tyá'najchij, ajta a'ñna i peerla tyi'táj; ¹⁷ ¡ajta jiye'tzín néijmi'i tyu'riá'xij i ti huápu'íj tyá'najchica'aj!

Majta néijmi'i a'ñmaj i maj báarcuj tyimuárie'rij, majta i maj tyí'muñjhuacaa i báarcuj

jitze i maj á'ciinyej i jájtyij japua, majta néijmi'i i maj hue'tyéé vivi', a'ñi mu a' imuáj jo'huíistiraa, ¹⁸ ajta mati'ij jaaséej a'íjci i citzítj ti ájcitzujtariaca' ti'ij tyátaasima'aj i chájta'naj, aj mu mij a'yan tyityeetyejíihuajraa tijin:

—¿Jo'nyij ajtáhua'aj síij chájta'naj já'sejre' ti'ij a'mújna?

¹⁹ Aj mu mij chuéj ti muíinyíj ahuóoratziraxij i jumu'új jitze, muuyínyaj majta jux-aamúuiritya'aj, a'yaa mu tyí'tyejijhuaca'aj tijin:

—¡Cuíi' xaa! ¡Cuíi' xaa a'íjna i chájta'naj ti ve'ej! A'íj mu jin huochíjtyaanyi'taca' muéetzij ti jimi tyí'sejre', néijmi'i i maj báarcuj tyíya'muaaca'aj i maj jin antac'ca'aj i jájtyij japua. A'ñi mu mij jiye'tzín jó'vej.

²⁰ Ajta i tajapuá siaj já'sejre', siata'aj hu-atóotyamua've'en, a'íjna jime' i chájta'naj, siata'aj huatóotyamua've'en mua'aj mu siaj jì're'nye'ej séejre' i Dios jimi, siajta mua'aj mu siaj antyíhuaviihuaca', siajta mua'aj mu siaj Dios jitze ma'can tyí'xaxa'aj, néijmi'i xu huatóotyamua've'en, jì'nye ti'ij i Dios jo'xíjtyej a'íjci i íitaj, aj pu mua'ajmaj tyámua' tya-jamo'xá'pui'intari'ri'.

²¹ Aj pu'ij síij ti tajapuá tyí'huiire' tyetyéj pu tyítii i maj jin tyá'ti'xícaa, aj pu'ij ja'tyájríee i jájtyij jitze ti ve'ej, a'yan tyi'xáataj tijin:

—A'yaa paj cha'taj atyojo'cárutyij muáaj chájta'naj paj ve'ej Babilonia paj ántyapuaj, camu mij che' a'náj muasejran. ²² Camu che' namuáaria'aj muá'ju'un i maj tyí'cui'nacaa i áarpaj jitze, nusu i maj tyí'ci'sityee túuturu'uj

jitze, na'ríij i trompéetaj jitze, camu majta che' tyi'muárie'ej muá'ju'un je'ej maj tyi'tíj tyu'yí'tin, capu ajta che' namuáaria'aj ta'mej i maj tyí'tixícaa. ²³ Capu che' a'táaj ja'mej muéetzij jimi i tiéj ti ú'taa i hua' chi'ij tzajta', capu ajta che' namuáaria'aj ja'mej i maj tyí'ye'estyaa a'íimaj i maj moochán huanyéjnye'i'chaca'. Ji'nye a'íimaj i maj tyí'to'racaria'aj mu a'íin pué'eenye'ej i maj a'yan japuan séjria'ca'aj i cháanacaj, i maj majta viváajma'aj jin tyityatatyá'ca'aj, i paj muáaj huo'cuanamuj mati'ij mana'aj pua'máj a'yan séejre' i cháanacaj japua. ²⁴ Ji'nye a'íjna jitze i chájta'naj a'íj mu jitze jáatyoj i hua' xuure' i maj Dios jitze ma'can tyí'xaxa'ta'aj, majta i maj ji'r'é'nye'ej séjria'ca'aj i Dios jimi, majta néijmi'i mati'ij mana'aj pua'máj huácuij i cháanacaj japua.

19

I maj tyí'chuiicaj u tajapuá

¹ Aj nu nyij tányij huó'namuajri' i maj tajapuá ca'nyíin jin mui'tíj tyajá'xajtaca'aj, a'yaa mu tíjin:

¡Alelúuyaj! Tyiche' tyaatatyójtzi're'en i Dios,
ji'nye a'íi pu tajapuá huatanyúj,
a'íj pu ajta jimi já'ma'can i ti naa huasé'rin,
ajta i ti jin néijmi'i putyí'uurej,

² a'íi pu tzáahuatyí'ra'aj jin huá'xijtye'en,
ajta je'ej ti tye'tyévijtye';

a'íi pu arí jo'xíjtyej a'íjci i íitaj ti jutyévira' jin
jamue'tica'aj i túmii,

ajta ca'nyíjra'aj huo'ta' néijmi'que' i cháanacaj
japua,

mej mij jamuán huóoxana'cire'en.

Dios pu'ij a'íjna puéjtzij jaatá' a'íjna jime' ti i íiti'
huo'cuij a'íimaj i maj jahuiire' i Dios.

³ Majtáhua'aj mu a'yan tyu'taxájtaca' tijn:

—¡Alelúuyaj! A'íjna i ti jitzán ájcitzuj i íitaj
capu a'náj huatyápua'rij.

⁴ Majta a'íimaj i huásij i maj seityéj japuan
muáacuj ará'asej, majta i maj muáacuj i
maj júurij, néijmi'i mu ecóotutaxij, mej mij
jaatyáanajche i Dios, i ti acájca ipuárij jitze.
A'yaa mu tyí'xajtaca'aj tijn:

—¡Che' a'yan tyá'ra'nyij! ¡Alelúuyaj!

⁵ Aj pu'ij síj huajíjhuaca' ti a'áa véjri'
jo'tyávaaca'aj jo'tij jo'tyéjvee i maj japuan
tyí'mu'vejritaca, a'yaa pu tyí'xajtaca'aj tijn:

Siata'aj tyaatatyójtzi're'en i Dios, néijmi'i mua'aj,
mu siaj viváajma'aj jin tyityatatyíj,
siajta mu siaj ciléenye' jin tyityatatyíj,
néijmi'i mua'aj mu siaj jahuiire' siajta
tzáahuatyí'ra'aj jimi tyícha'ij.

Tí'ij huatyényeichij i Cánya'aj

⁶ A'yaa nu nyajta tyihuó'namuajri' maj jéehua
i tyeítyee tyí'xajtaca'aj, a'yaa pu namuajria'ca'aj
ti'ij jo'tij jájtyij ja'ancáamuí'yej, ajta a'yan na-
muajria'ca'aj ti'ij i víityee maj tyényuuca'an.
A'yaa mu tyí'xajtaca'aj tijn:

¡Alelúuyaj! Tyiche' tyaatatyójtzi're'en i Dios,
ji'nye pu'ríj huatyóochej ti tyu'ta'íjtaj i
tavástara',

ajta i Dios i ti néijmi'i jin antyúumua'reej.

7 Tyiche' huátatyamua've'en, tyajta
tyaatatyójtzi're'en,
ji'nye pu'ríj a'ájna atyojo're'nyej tí'ij i cánya'aj
huatyényeichij.

Ajta i tí íira'ra'an pué'eenye'ej ta'mej pu'ríj ajta
tyámua' huóoruuj.

8 A'yaa mu tyaatá' tí a'íjna tyu'tyóchejtyej i
cáanarij tí me'estíj tí ajta naa een, tí
tyama'astáji'ij tí quee choomua.

Ji'nye a'íjna i cáanarij tí naa een, a'íi pu pué'een
i maj jin tyámua' tyityetyúucha'íica'aj a'íimaj i
tyeítyeristyamua'me'en i Dios.

9 Ajta i tí tajapuá tyí'huiire' a'yaa pu tyi-
naaté'exaaj tíjin:

—Ootyéyu'xaj a'yan tíjin: “Miche' hu-
atóotyamua've'en a'íimaj i maj huo'tá'inyej
mej mij jamuán tyú'cua'nyij i cánya'aj a'ájna
xicáara' tí jitzán huatyényeichij.”

A'yaa pu ajta tyinaaté'exaaj tíjin:

—A'íjna i nyúucarij nyaj mua'ixaatyé' Dios pu
jí're'can jime' janyuucaa.

10 Aj nu nyij tyítunutaca' jo'tij ja'ra'íicajmee
nyej nyij jaatyáanajche, aj pu'ij a'yan tyi-
naaté'exaaj tíjin:

—Capáj a'yan rijcaj, ji'nye nyáaj nu jahuiire'
i Dios, a'yájna patí'ij muáaj majta a'íimaj i
a'ihuámua' i maj a'yan ricij je'ej tí i Jesús
tyihuó'ixaaaj. Pata'aj i Dios huatyáanajchej.

Ji'nye a'yájna tí'ij tyu'xájtaca' i Jesús, a'íi pu
a'íin pué'een i tí huo'cámua'riiityej a'íimaj i maj
Dios jitze tyí'xajtaca'aj.

A'íjna i ti avá'caj i cahuáayu' japua ti cuéeinara'

¹¹ Aj nu nyij jaaséej ti antácuunyica'aj u tajapuá, aj pu'ij cahuáayu' huataséjre ti cuéeinara', ajta i ti avá'caj a'yaa pu ántyapuaaj tijin I ti tyámua' een ti ajta tzáahuatyi'ra'aj jin tyí'xaj, ji'nye tyámua' pu tyí'ijtaca'aj, ajta a'yan cha'taj tyí'nyo'sa'ca'aj. ¹² A'yaa pu huasé'rihua'aj i ji'sáara' ti'ij tiéj ti á'taa, ajta mui'caa tyo'carújtya'ajma'caa i cúruun i jumu'új jitze, ajta jitzán á'yu'si'ij je'ej ti a'ín ántyapuaaj, ajta a'í na'aj jusíj yó'itej. ¹³ Ajta i cáanarij ti tyí'chajca'aj xúure'ej pu jéehua a'ma'ca'aj, ajta a'yan ántyapuaaj tijin I Nyúucaria'ra' i Dios. ¹⁴ Majta cújta' huajú'ca'aj i xantáaru' maj tajapuá já'ma'can, cuéeinavi' metyi'cháaj ti tyi'tyama'astáji'caa ti ajta huápu'i'ij tyi'jí're'en ajta quee tyí'choomuavi'ca'aj, majta je'en cahuáayu'uj japua ave'tye'tya'ajma'caa maj cueinaa. ¹⁵ Ajta i tyényi'tze' náhuaaj pu éejnyinyiica'aj ti huápu'i'ij tyí'itzi, ti'ij jin tyihuo'puéjtye'en i néijmi'caa i tyeítjee i maj a'yan séejre' i cháanacaj japua. Ca'nyéjrij pu jin tyihuo'ta'íjtye'sij. Ajta a'ín hua' japua jaráriesij i ti jin huápu'i'ij nyú'camui' i Dios ti néijmi'i jin antyúumua'reej. ¹⁶ Ajta i máancajra'an jitze, huárita' pujmua' a'yaa pu tyé'yu'si' tijin: "Hua' tajtúhuan i tajtúhuaanyij, ajta i ti tyihuá'ijtye' i maj tyí'ijta."

¹⁷ Nyajta je'en séej huaséj i ti tajapuá tyí'huire', a'áa pu jo'tyávaaca'aj i xicáj jitze, a'yaa pu ca'nyíin jin tyihuo'tajé néijmi'caa i

pína'see i maj jútye' ra'ra' tijin:

—Siata'aj mujo'vá'ju'un siaj sij tyú'cua'nyij i Dios ti tyaja'muacue'tyen, ¹⁸ siaj sij jáacua'nyij i huá'hue'ra' a'íimaj i maj tyí'ijta, i maj ty-ihuá'ijtye' i xantáaru', siajta i huá'hue'ra' i tyétyacaa i maj jéehua uhuácaca'nye', siajta huá'hue'ra' i cahuáayu'uj, majta i maj ave'tye'tya'ajma'caa, néijmi'i i huá'hue'ra' i tyétyacaa, i maj juxáahuaj ciinyej, nusu i maj ca'nyéjrij jin tyí'muarie', i maj ciléenye' jin tyityatatyíj, nusu i maj va'cán jin tyí'huüre'.

¹⁹ Nyati'ij nyij jaaséej a'íjci i ti je'ej pua'aj huasé'rin nyajta i maj tyí'ijta i cháanacaj japua hua' jamuán i juxantáaru'ustyamua', maj aja'tyúusiiria'ca'aj mej mij jaatanyo'si'tye'en a'íjci i ti avá'caj i cahuáayu' japua, majta i xantáaru'ustyamua'mua'. ²⁰ Ajta a'íjna i tyi'tíj ti je'ej pua'aj huasé'rin, a'íj mu hu-atyéevi', majta jamuán a'íjna i ti hue'tzij jin tyí'xajtaca'aj a'íjna jitze ma'can, i ti ajta jitzán ma'can jéehua tyu'muáriej. A'íj pu jin huo'cuanamuaj a'íjna i ti jitzán ma'can hue'tzij jin tyí'xajtaca'aj, a'íjma i maj huatóoa' maj hua' jitze jo'yú'xaj je'ej ti ántyapuj a'íjna i tyi'tíj majta jaatyánajchaca'. Aj pu'ij a'íjna i tyi'tíj ti je'ej pua'aj huasé'rin, ajta i ti hue'tzij jin tyí'xajtaca'aj a'íi mu huavívi'ri'huaca', mati'ij mij a'áa huaja'tyáahua'xij júurican jo'tíj ja'alaguun ti asúufrej jin á'taa. ²¹ Majta i séecan a'íi mu huácu'iihuaca' a'íjna jime' i chúun ti éejnyinyiica'aj i tyényi'tze' a'íjna i ti cahuáayu' japua avá'caj, majta néijmi'i i pína'see tyámua'

mu tyityaatajú'xaj a'íjna jime' i huá'hue'ra' i maj huácuij.

20

Ciríistu' pu tyu'ta'íjtaj séej ví'ra'aj nyinyi'ra'aj

¹ Séej nu huaséj i ti tajapuá tyí'huiire' ti jútye' aje'cáma'ca'aj, ajta yáavij huáchuisima'aj i ti jin ja'tyáanaj jo'tij ja'tyácun ajta cadéenaj huapísime'ej ti vivéj. ² Aj pu'ij jaatyéevi' a'íjci i cú'cu'uj, a'íjna i ti jájcuaj imuáj huataséjre, i ti a'ín pué'een i tyiyáaru', aj pu'ij jaatyáaji'quej ti'ij séej ví'ra'aj nyinyi'ra'aj jí'qui'huaj. ³ Aj pu'ij a'áa ye'tyájríee jo'tij ja'tyácun, ajta je'en ja'tyáanaj ta'aj ij quee che' huá'cuanamuaj i maj séej chuéj japua já'ma'can 'asta na'aj quee mutyojo'me'en séej ví'ra'aj nyinyi'ra'aj, aj pu'ij té'ej caira'tzuj tyu'tátuihuaj.

⁴ Nyati'ij nyij ipuárij tyu'séj, a'íjma mu jitzán acátye'tya'aj i maj ja'ancuriáa' mej mij huo'xíjtye'en i tyeítýee. Nyajta je'en hua' júuricamej huaséj a'íjma i maj hui'ijveechixij i hua' mu'uj a'íjna jime' maj tyámua' éenye'ej i Jesús jimi, majta a'íjna jitze i nyúucaria'ra' i Dios. A'íimaj i maj quee jaatyánajchaca' a'íjci i ti je'ej pua'aj huasé'rin camu majta i ti jahuiire', majta quee huatóoa' maj hua'ajtyiyú'xaxi'in i huá'cuaatze' nusu i jumuáca' jitze. Aj nu nyij huo'séj maj huatájuuriaca' majta je'en jamuán tyu'ta'íjtaca' i Ciríistu' séej ví'ra'aj nyinyi'ra'aj jitze. ⁵ Majta i séecan i maj huácuij, camu huatájuuriaca' 'asta na'aj quee mutyojo'mej séej ví'ra'aj nyinyi'ra'aj. A'íi mu a'ín pué'een i

maj anaquéj huatájuuriaca'. ⁶ Miche' huatóotyamua've'en a'íimaj i maj hua' jamuán anáatya'aj huatájuurij, ji'nye a'íijma mu jitze ajtyáma'can i tyeítyeristyamua'me'en i Dios. Majta quee che' cui'nyij, sulu a'íi mu tyitye'entyárutyij i Dios jimi, majta i Ciriístu' jimi, mej mij séej ví'ra'aj nyinyi'ra'aj jamuán tyu'ta'íjtaj.

Dios pu ja'antyimué'tij i tyiyáaru'

⁷ Ti'ij mutyojo'me'en i séej ví'ra'aj nyinyi'ra'aj, a'íi pu i tyiyáaru' huatátuihuaj jo'tij je'tyánami'huaca'aj, ⁸ aj pu'ij eetaméj ti'ij huo'cuanamuan a'íijma i maj séej chuéj japua já'ma'can, i maj a'áa jo'cháatimee jo'tij i xicáj jé'ejnyinyiij, majta i maj a'áa pujmua' jo'cháatimee jo'tij i xicáj ja'ancáru'pij, majta i maj ajtyapuáj pujmua' jo'cháatimee, majta i maj áatyey pujmua' huacháatimee, ajta a'íjci i ti a'yan ántyapuaj tijin Gog, ajta a'íjci i Magog, majta néijmi'caa i maj hua' jitze ajtyáma'can i maj a'yan ará'asej ti'ij i séj ti a'áa ja'ajtyájcaj jo'tij ja'va'ástimee i jájtyij ti ve'éj, a'íijma mu mij tyísiire'ej mej mij huatyényo'se'en. ⁹ Mati'ij mij néijmi'que' oorióonajchaca' ti'ij na'aj ooyóhuaj i chuéj, mati'ij mij hua'ajnáj jo'maj tyojo'tyá'inaamuarica'aj i maj tyámua' een i Dios jimi, a'íijma i Dios ti hua'xie've'. Ajta tiéj pu uje'cájvej u tajapuá, ti'quij huo'tyáatiej a'íijma i maj jamuán huajú'ca'aj i tyiyáaru'. ¹⁰ Ajta i tyiyáaru', i ti huo'cuanamuaaj, a'áa pu ja'tyárieehuaca' jo'tij ja'alaguun ajta já'taa i asúufrej jime', jo'maj majta ja'tyáavatzij a'íjna i ti je'ej pua'aj huasé'rin ajta a'íjna

ì ti jahuiiria'ca'aj, ajta a'íjna ì ti hue'tzij jin tyí'xajtaca'aj. A'áa mu mij jajpuéetzij muá'ju'un tújca majta tíca' majta jusén jime'.

Dios pu huá'xijtye'en a'ájna jo'tij já'sejre' ì ipuárij ti ve'éj

¹¹ Nyati'ij nyij ipuárij huaséj ti ve'éj ti naa tyí'cueenara', nyajta a'íj huaséj ì ti acájca. Ajta ì cháanacaj, ajta ì tajapuá, a'áa pu ja'huóopua'rixij a'íjna jimi, camu che' ma' já'sejria'ca'aj. ¹² Nyajta je'en a'íjma huaséj ì maj huácuij, ì maj huásij majta ì maj cíleen, a'áa mu ja'riá'vaaca'aj a'íjna jimi ì ipuárij, aj mu mij séej ootácuuraca' ì yu'xarij, majtáhua'aj séej ootácuuraca' ì yu'xarij ì maj jitzán á'yu'si'ij je'ej maj ántya'ruj ì maj júurij huatyá'itzeere'ej ì Dios jimi. Majta a'íjma ì maj merij huácui'ijcaa a'yaa mu tyityo'xíjtyi'huaca' je'ej maj tyi'tíj huáruuj mati'ij móoj júurica'aj, majta je'ej ti tyé'yu'si'huaca'aj ì yu'xarij jitze. ¹³ Aj mu mij huataséjre ì maj atyájcuii ì jájtyij jitze, majta néijmi'i ì séecan ì maj huácui'ijcaa, néijmi'i mu majtáhua'aj huatájuuriaca', aj pu'ij Dios huo'xíjtyej a'íjna jime' je'ej maj tyi'tíj jin huaríj mati'ij móoj júurica'aj. ¹⁴ Ajta je'en a'íjna ì ti tyí'tyacui'caa a'áa pu ja'tyárieehuaca' jo'tij ja'alaguun ajta á'taa asúufrej jime'. A'íi pu a'íin pu'éen ì maj majtáhua'aj jin cui'nyij, ¹⁵ a'áa mu majta huaja'tyáahua'xij ì maj quee áyu'si'huaca'aj je'ej maj ántya'ruj ì yu'xarij jitze ti hua'tá'caa maj jusén jin júurij huatyá'itzeere'en ì Dios jimi.

21

A'íjna i tajapuá ti já'sejre' ti jájcuaj ajta i cháanacaj ti ajta jájcuaj

¹ Aj nu nyij tányij i tajapuá huaséj ti jájcuaj, nyajta i cháanacaj ti ajta jájcuaj, ji'nye a'íjna i tajapuá ti anaquéej séjria'ca'aj, ajta a'íjna i cháanacaj ti mí'ma'can, capu che' séjria'ca'aj, ajta i jájtyij ti ve'ej, capu ajta che' séjria'ca'aj.

² Nyajta je'en jaaséej i chájta'naj ti jájcuaj ti ajta naa een i ti a'yan ántyapuaj tíjin Jerusalén, ti jútye' aje'cáma'ca'aj jo'tij i Dios já'sejre'. Tyámua' pu huóruuj a'íjna i chájta'naj tí'ij i íiti' ti huatyéviche'sij. ³ Nyajta je'en nyúucarij huánamuajri' ti ca'nyiin jin a'áa ty-ojo'taxájtaca' jo'tij i ipuárij jo'tyávaaca'aj, a'yaa pu tyí'xajtaca'aj tíjin:

—Iiye'ej pu putyí'ricij jo'tij já'sejre' i Dios hua' jamuán i tyétyacaa. Hua' jamuán pu huatyá'itzeere'ej, majta a'íimaj mu tyeítyeristyamua'me'en pue'éenye'ej muá'ju'un. Ajta i Dios a'íi pu hua' Dios pu'éenye'ej ta'mej.

⁴ Tyámua' pu tyihuo'tyéjeevij mej mij quee che' juxaamuijritya'aj, camu che' cui'nyij, camu che' juxaamúuiritya'aj muá'ju'un a'íjna jime' ti sáij huamuí', camu majta che' juyiinyaj muá'ju'un, camu che' tyi'tíj jin jajpuéetzij muá'ju'un, ji'nye a'íjna i ti aamí' tyí'sejria'ca'aj capu che' tyi'séere'ej ta'mej.

⁵ Ajta a'íjna i ti ipuárij jitze acájca a'yaa pu tyu'taxájtaca' tíjin:

—Nyáaj nu néijmi'i tyi'jajcuare'en i ti tyí'sejre'. Ajta a'yan tíjin:

—Ootyéeyu'xaj a'íjci, ji'nye a'íi pu nyúucarij tzáahuatyi'ra'aj jin tyí'xaj, ajta i'ríj siaj jitzán tyú'ca'nyej.

⁶ Aj pu'ij a'yan tyinaaté'exaaj tijin:

—Pu'ríj tye'entyíci'pii huaca'. Nyáaj nu a'íin pué'een i nyaj anájcaj, nyajta i nyaj uvé'tyajtij, nyáaj nu jájcuaj imuáj huataséjre, nyajta jusén jime' séeria'aj na'mej. A'tíj tina'aj ti huataí'imu'un nyáaj nu huáapua'aj jaatá'sij a'íjci i jájtyij ti a'áa já'ajnyinyii jo'tij ja'ajréxaj, a'íjna i jájtyij i ti jin júurij ja'mej jusén jime'. ⁷ Ajta a'íjna i ti tyu'tyámue'tin, néijmi'i pu a'íjna tyá'ci'tyij, nyáaj nu Dios ra' pue'éenye'ej na'mej, ajta a'íi pu nyiyóoj pue'éenye'ej ta'mej. ⁸ Majta a'íimaj i maj je'ej pua'aj tyityetyúucha'íj, i maj quee tyá'tzaahuatye', i maj tyú'xana've', i maj tyí'tyacui'caa, i maj úucaa jamuán juxana'cire', i maj tyí'chahuaa, i maj sáanturij najchej majta i maj tyí'hue'tacaa, a'yaa pu tyihuá'ci'tyij maj a'áa jo'tyá'itzeere'en jo'tij ja'alaguun ti asúufrej jin á'taa, a'íi pu a'íin pué'een i maj jin majtáhua'aj cui'nyij.

I Jerusalén ti jájcuaj

⁹ Aj pu'ij sáij nye jimi aje're'nyej i ti tajapuá tyí'huire' ti hua' jitze ajtyáma'can i maj aráahua'puaj ará'asej, i maj túxa'aj tyí'tyái'pu'ca'aj i ti ajta aráahua'puaj tya'rá'asej, i ti jitzán arámuaaca'aj i cui'nyi'ra'aj i maj jin jajpuéjtzica'aj i tyeítyee, a'yaa pu tyinaaté'exaaj tijin:

—Mujo'té'yi'ij, nyáaj nu muaataséjratye'sij a'íjna i ti jimí tya'tóoraj i cánya'aj ti ajta íira'ra'an pue'éenye'ej ta'mej.

¹⁰ Ajta je'ej ti tyinaataséjra i júuricama'ra' i Dios, a'íi pu i ti tajapuá tyí'huüre' nyo-joovi'tij jo'tij jiríj jo'tácaj ti huápuí'ij ájtyeej, aj pu'ij naataséjraj i chájta'naj ti naa een i ti a'yan ántyapuaj tijin Jerusalén, a'áa pu jútye' je'cáma'ca'aj jo'tij i Dios já'sejre'.
¹¹ Naa pu tyi'tyama'astájyi'caa a'íjna i chájta'naj ti'ij ajta i Dios ti huápuí'ij naa huasé'rin, a'yaa pu tyi'tyataátiyi'caa ti'ij i tyetyéj ti huápuí'ij tyá'najchij, ti'ij ajta tyi'tatzaj a'íjna i cristal. ¹² Va'tíj pu jin curiá'nami' ajta tyámua' tyé'ejtyee, tamuáamuata' japuan hua'puaj pu ará'axcaa jo'tij ja'pueertaj, ajta jo'tij ja'pueertaj tajmee a'íi mu eetyú'uuca'aj i maj tajapuá tyí'huüre', ajta néijmi'que' puéertaj jitze síj ajta síj a'yaa pu tyé'yu'si'huaca'aj je'ej maj ántya'ruj a'íimaj i tyeítysteristyamua'me'en i maj hua' jitze eeráma'can a'íimaj i yójmua'mua' maj Israel jitze ajtyáma'can. ¹³ Huéecaj pu pua'maquéj a' puéertaca'aj a'ájna pujmua', jo'tij i xicáj jé'ejnyinyiij, ajta huéecaj pua'maquéj ajtyapuáj pujmua', a'yaa pu ajta huéecaque' tyá'pueertaca'aj áatyey pujmua', ajta huéecaque' a'ájna pujmua' jo'tij i xicáj ja'ancáru'pij. ¹⁴ Ajta tamuáamuata' japuan hua'puaj i tyetyéj ataquéetime i ti japuan ájtaavijhuaca' i ti jin curiá'nami' i chájta'naj, a'íj pu'ij jitze á'yu'si'ij je'ej maj ántya'ruj i maj tamuáamuata' japuan hua'puaj ará'asej, i

cánya'aj ti hua'antyíhuoj.

¹⁵ Ajta a'íjna i ti tajapuá tyí'huiire' ti nyajamuan tyí'xajtaca'aj, a'íi pu tyí'tíj iityéchooca'aj ti'ij ciyéj ti ooroj jin taavijhuaca'aj, a'íi pu a'íin pué'een i ti jin jaatyé'iten a'chu tij ve'éj i chájta'naj, ajta a'chu ti antayóhuaj i puéertaj, ajta a'chu ti ájtyeej i ti ájtaavijhuaca'. ¹⁶ Ajta i chájta'naj juxa'aj pu huatátyeevi'ca'aj, a'chu ti huatátyeej a'yaa pu cha'tána'aj ooyóhuaj. Ajta i ti tajapuá tyí'huiire' a'íi pu jaatyé'itej i chájta'naj a'íjna jime' i ciyéj, hua'puaj ví'ra'aj quilometroj pu huatátyeej i chájta'naj, a'yaa pu cha'tána'aj aantayóoj, ajta a'yan cha'tána'aj ájtyeevi'ij. ¹⁷ Aj pu'ij té'ej jaatyé'itej a'íjci i ti ájtaavijhuaca', a'yaa pu'ij ájtyeej huéecatyej japuan anxíviij meetroj pu ájtyeej, ajta a'íjna i ti tajapuá tyí'huiire' a'yaa pu tyetyé'itej mat'íj tyá'mua'reej i tyétyaaa.

¹⁸ Ajta i jáxu'uj tyetyéj pu jin ájtaavijhuaca' maj a'yan jatamuá'muaj tijin diamante, ajta néijmi'i i chájta'naj, ooroj pu jin taavijhuaca'aj, ajta a'yan tya'tátaave'ej ti'ij i jájtya'huaa. ¹⁹ Ajta i ti atátaavijhuaj i ti japuan ájtaavijhuaj i ti jin curiá'nami' i chájta'naj, naa pu tyámua' tyí'taavijhuaca'aj a'íjna jime' i tyetyéj ti huápu'i'ij naa huasé'rin, anaquéej pu a'íjna i tyetyéj ti a'yan ántyapuaj tijin diamante, ajtáhua'aj síj i zafiro ti puíríci, ajta a'íjna i ágata ti tyetyéj pué'een ti síichira', ajta a'íjna i tyetyéj ti huá'raa esmeralda ti ántyapuaj, ²⁰ ajta a'íjna i ónice ti yú'xare', ajta a'íjna i cornalina ti po'vij, ajta i crisólito ti tyóomuara', ajta a'íjna i

berilo ti cǎi tyí'tyoomuara', ajta a'íjna i topacio ti naa tyí'tyoomuara', a'íjna crisoprasa ti naa tyí'tyoomuara' ajta cǎi tyi'hua'raa, ajta a'íjna jacinto ti nacámuaa, ajta a'íjna i amatíista ti naa tyí'nyeeri'ij. ²¹ A'íjna i puéertaj ti tamuáamuata' japuan hua'puaj ará'asej, a'íj pu jin taavijhuaca'aj i peerla. Ajta néijmi'i i cáayej ooroj pu jin taavijhuaca'aj ti a'yan tyí'tatzaj ti'ij i jájtya'huaa.

²² Nyajta quee tyeyúuj a jo'séj, i chájta'naj jitze, ji'nye a'íjna i tavástara', i Dios ti néijmi'i jin antyúumua'ree, a'íi mu a'íin pué'een i tyeyúuj, ajta a'íjna i cánya'aj. ²³ Ajta a'íjna jitze i chájta'naj, capu juxie've' ti i xicáj huá'tatzavi'tya'aj nusu i máxcirie', ji'nye a'íi pu jin i Dios huányeeri'ij, ajta a'íjna i cánya'aj, a'íi pu a'íin pué'een i tatzárij. ²⁴ Majta a'íimaj i tyeítjee a'íi mu nyéeri'iste' ciinyej muá'ju'un i chájta'naj jitze, majta a'íimaj i maj tyihuá'ijtye' i maj a'yan huacháatimee i cháanacaj japua, a'íi mu tyu'tátuiire'sij i maj jin chújtyaanyi'taca'aj. ²⁵ Camu a'náj tye'tyánasij jo'tij ja'pueertaj i chájta'naj jitze, ajta quee a'náj huatíca'aj ta'mej, ²⁶ a'íj mu jimi tyu'tátuiire'ej néijmi'i i maj tyí'ijcha'ij i maj va'cán jin tyityatatyíj, majta i maj jin huápuí'ij naa huasé'rihua'aj, ²⁷ ajta quee a'náj tyi'táj ti xána'vi're' utyárutyij u chájta'naj jitze, nusu a'táj ti je'ej pua'aj tyi'tyúucha'ij, nusu i ti tyú'cuanamuaaj. Sulu a'íi mu'uj i maj á'yu'si'ij i yú'xaria'ra' jitze i cánya'aj i ti hua'tá'caa mej mij jusén jin júurij.

22

A'íjna i játya'naj ajta i ciyéj ti a'áa já'sejre'

¹ A'íjna i ti tajapuá tyí'huüre' pu játya'naj naataséjraj ti naa éenye'ej mui'yej, ajta a'íjna i jájtyij júuricamej pu tyu'tá'caa. Naa pu tyi'me'estij i jájtyij ti'ij i cristal, ajta a'áa je'rányajcaa jo'tij jo'tyéjvee i ipuárij ti jitzán acájca i Dios, ajta a'íjna i cánya'aj. ² Ajta a'áa jé'ta' je'cámu'yaca'aj i cáayej jitze, ajta juxa'aj i ciyéj tye'ejtyaváatima'caa jo'tij joo'ástimee i jájtyij, a'íi pu a'íin pué'een i ciyéj i maj jin júurij muá'ra'nyij, tamuáamuata' japuan hua'puaj pu pua'máj tajcaria'aj séej nyinyi'ra'aj jitze, ajta i xámue'ra', a'yaa pu tyí'huüre' mej mij a'íjna jin tyihuo'huaatye'en a'íimaj i maj séej chuéj japua jo'cháatimee. ³ Capu che' tyi'tíj séeria'aj ta'mej ti je'ej pua'aj huó'uurej. A'íjna i ipuariáara'an i Dios ajta i cánya'aj, a'íi pu séeria'aj ta'mej i chájta'naj jitze, mej mij i tye'ítyeristyamua'me'en jaatyáanajche. ⁴ A'íi mu jaséeraj muá'ju'un, ajta huá'cuatze' séeria'aj ta'mej je'ej ti a'íin ántyapuj. ⁵ Capu a'náj huatyática'rij a'ájna, majta a'íimaj i maj a'áa ja'chej, capu che' hua' jitze juxié'va'aj ta'mej i tatzárij, nusu i xicáj, ji'nye a'íi pu tavástara' i Dios hua'tátzavi'raj ja'mej, majta a'íimaj mu tyi'ítaj muá'ju'un jusén jime'.

⁶ Aj pu'ij a'yan tyinaaté'exaaj a'íjna i ti tajapuá tyí'huüre' tijin:

—A'íi pu i nyúucarij tzáahuatyira'aj jin séejre' ajta ji'récán jime'. A'íjna i tavástara' i Dios, a'íi pu a'yan tyihuo'tá' i ju júuricamej

a'íjma i maj jitzán ma'can tyí'xajtaca'aj, a'íi pu'ij ajta nyéetzij nyojo'ta'ityaca' neyey nyij ty-ihuo'taséjratye'en a'íjma i maj jahuiire' i Dios je'ej ti jiye'tzín atyojo're'nyesij.

⁷ —¡Jiye'tzín nu uvé'nyesij!

¡Che' huatóotyamua've'en a'íjna i ti ja'astej je'ej ti tyé'yu'si' a'íjci i yu'xarij jitze!

⁸ Nyáaj, Juan, nyáaj nu jáanamuaajri' nyajta jaaséej je'ej ti tyé'yu'si' a'íjna jitze i yu'xarij. Ajta nyati'ij a'yan tyáanamuaajri', nyajta a'yan tyu'séj, aj nu nyij jimi tyítunutaca' a'íjci i ti tajapúa tyí'huire', neyey nyij jaatyáanajche. ⁹ Ajta a'íjna a'yaa pu tyinaaté'exaaaj tijn:

—Capáj a'yan rijcaj, ji'nye nyáaj nu nyajta jahuiire' i Dios, a'yájna pati'ij muáaj, ajta mati'ij majta a'ihuáamua' i maj Dios jitze ma'can tyí'xajtaca'aj majta néijmi'i a'íimaj i maj a'yan ricij je'ej ti tyé'yu'si' a'íjci jitze i yu'xarij. Pata'aj a'íj huatyáanajchej i Dios.

¹⁰ A'yaa pu ajta tyinaaté'exaaaj tijn:

—Capáj ja'avaataj i nyúucarij ti á'yu'si'ij a'íjna jitze i yu'xarij, ji'nye pu'rij atyojo're'nyesij a'ájna xicáara' ti jitzán néijmi'i tye'entyipúa'rij. ¹¹ Ajta a'íjna i ti je'ej pua'aj tyi'tyúucha'ij, che' ooj je'ej pua'aj tyi'tyúucha'íj, ajta i ti xána'vi're', che' ooj xána'visi' séjre'ej, ajta i ti ji'réenye'ej séjre' i Dios jimi, che' ooj tyámua' tyi'sejria'aj.

¹² —A'yaa pu tyi'ja'yájna, nyáaj nu jiye'tzín uvé'nyesij, nyajta jaa'á'sima'aj na'mej je'ej ti síj tyi'tíj jin huaríj. ¹³ Nyáaj nu a'íin pué'een i ta'nájcaj, nyajta i nyaj uvé'tyajtíj, nyajta a'íin pué'een i nyaj jájcuaj imuáj huaséjre, nyajta

jusén jime' séeria'aj na'mej, nyáaj nu anaquéej huataséjre tí'ij quee xu tyí'tíj séjria'ca'aj, nyajta nu a'ín pué'een i nyaj néijmi'i tya'ancuriáa'sij tí'ij tye'entyipua'rej ijíj tí tyí'sejre'.

14 Miche' huatóotyamua've'en a'ímaj i maj tyí'jo'sicaa i tyúucaanaa tí'ij a'yan tyihuó'ci'tyij maj jáacua'nyij i táque'ra' i ciyéj i maj jin júurij huatyá'itzeere'en, mej mij majta a'áa jo'tyájrutyej jo'tíj ja'pueertaj i chájta'naj.

15 Majta apua'quéj mu jo'tyá'itzeere'ej i maj je'ej pua'aj tyityetyúucha'íij, majta i maj tyí'chahuaaraj, majta i maj juxana'cire', majta i maj tyí'tyacui'caa, majta i maj saanturij na'michej majta néijmi'i i tí a'yan tyihua'ráanajchi i tí hue'tzij pué'een, mej mij a'náj tina'aj tyí'hue'taj.

16 —Nyáaj, Jesús, nyáaj nu jaata'ítയാ'ca' ja'mua jimi a'íjci i tí nyahuíre' tí'ij tyajamuaté'exaatye' mua'ajmaj mu siaj jusi'rii i tyeyúuj tzajta'. Nyáaj nu a'ín pué'een i nyaj David jitze eeráma'can. Nyáaj nu a'ín pué'een i xú'ra'vej tí eeré'nyinyii tapuá'risima'caj.

17 Ajta i júuricama'ra' i Dios, ajta i tí oochán huatyéevichej i cánya'aj, a'yaa mu tyí'xaj tíjin:

—Mupo've'me'.

Ajta i tí iityánamuaj, che' ajta a'yan tyu'taxáj tíjin:

—Mupo've'me'.

Ajta i tí í'mu'uj, ajta jaxie'va'aj tí huaye'en, che' mujo've'me'en ajta je'en huáapua'aj jaayé'en i jájtyij i tí jin júurij huatyá'itzeere'ej.

¹⁸ Ajta néijmi'i i maj janamuaj je'ej ti tyé'yu'si' a'íjci jitze i yu'xarij Dios jimi ti já'ma'can, tipua'aj seequéj tyaataxáj, Dios pu puéjtzij jaatá'sij a'yájna ti'ij tyé'yu'si' a'íjci jitze i yu'xarij.

¹⁹ Ajta tipua'aj a'tíj je'cácaa jóo'uunaj i ti tyé'yu'si' i yu'xarij jitze, Dios pu jáa'ri'raj i ti jaci'tyij ti jáacua'nyij i táque'ra' i ciyéj ti jin júurij já'ra'nyij, ajta quee che' jaci'tyij ti a'áa jo'tyájrutyey i chájta'naj jitze ti naa een, a'yájna ti'ij tyé'yu'si' i yu'xarij jitze.

²⁰ Ajta i ti a'íjna jin a'yan tyí'xaj, a'yaa pu tyí'xaj tijin:

—A'yaa pu tyi'ja'yájna, nyáaj nu jiye'tzín uvé'nyesij.

Che' a'yan tyá'ra'nyij. ¡Mupo'vé'me' tavástara' Jesús!

²¹ Che' a'íjna i tavástara' i Jesús, che' a'íin tyámua' néijmi'caa mua'ajmaj tyajamuáacha'íin.

**I nyúucarij ti jájcua ti a'ijna á'xaj i
Tavástara' i Jesús ti Ciríistu' pue'een ajta
Salmos
Cora, Santa Teresa: I nyúucarij ti jájcua ti a'ijna
á'xaj i Tavástara' i Jesús ti Ciríistu' pue'een ajta
Salmos New Testament+**

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

4f03662f-a4e0-5c7c-a13b-0b7002b5b8f6